

宋史卷四百九十一

元中書右丞相總裁脫脫等修

列傳第二百五十

外國七

流求國 定安國 渤海國 日本國 党項

流求國在泉州之東有海島曰澎湖烟火相望其國塹

柵三重環以流水植棘爲藩以刀稍弓矢劒鼓爲兵器

眎月盈虧以紀時無他奇貨商賈不通厥土沃壤無賦

歛有事則均稅旁有毗舍邪國語言不通袒裸盱眙殆

非人類淳熙間國之酋豪嘗率數百輩猝至泉之水澳

圍頭等村肆行殺掠喜鐵器及匙筯人閉戶則免但刳其門圈而去擲以匙筯則頻拾之見鐵騎則爭刳其甲駢首就戮而不知悔臨敵用標鎗繫繩十餘丈爲操縱蓋惜其鐵不忍棄也不駕舟楫惟縛竹爲筏急則羣舁之泗水而遁

安定國本馬韓之種爲契丹所攻破其酋糾合餘衆保于西鄙建國改元自稱定安國開寶三年其國王烈萬華因女真遣使入貢乃附表貢獻方物太平興國中太宗方經營遠略討擊契丹因降詔其國令張倚角之勢其國亦怨寇讎侵侮不已聞中國用兵北討欲依王

師以摠宿憤得詔大喜六年冬會女真遣使來貢路由
本國乃托其使附表來上云定安國王臣烏玄明言伏
遇聖主洽天地之恩撫夷貊之俗臣玄明誠喜誠抃頓
首頓首臣本以高麗舊壤渤海遺黎保據方隅涉歷星
紀仰覆露鴻鈞之德被浸漬無外之澤各得其所以遂
本性而頃歲契丹恃其強暴入寇境土攻破城砦俘略
人民臣祖考守節不降與衆避地僅存生聚以迄于今
而又扶餘府昨背契丹竝歸本國災禍將至無大於此
所宜受天朝之密畫率勝兵而助討必欲報敵不敢違
命臣玄明誠懇誠願頓首頓首其末題云元興六年十

月日定安國王臣玄明表上聖皇帝前上答以詔書曰
勅定安國王烏玄明女真使至得所上表以朕嘗賜手
詔諭旨且陳感激卿遠國豪帥名王茂緒奄有馬韓之
地介于鯨海之表疆敵吞併失其故土沉寃未報積憤
奚伸矧彼獯戎尚搖蠱毒出師以薄伐乘夫天災之流
行敗衄相尋滅亡可待今國家已于邊郡廣屯重兵只
俟嚴冬卽申天討卿若能追念累世之恥宿戒舉國之
師當予伐罪之秋展爾復仇之志朔漠底定爵賞有加
宜思永圖無失良便而況渤海願歸於朝化扶餘已背
於賊庭勵乃宿心糾其協力克期同舉必集大勲尚阻

重溟未遑遣使倚注之切鑿寐寧忘以詔付女真使令齋以賜之端拱二年其王子因女真使附獻馬雕羽鳴鏑淳化二年其王子太元女真使上表其後不復至

渤海本高麗之別種唐高宗平高麗徙其人居中國則天萬歲通天中契丹攻陷營府高麗別種大祚榮走保遼東睿宗以爲急汗州都督封渤海郡王因自稱渤海國併有扶餘肅慎等十餘國歷唐梁後唐朝貢不絕後唐天成初爲契丹阿保機攻扶餘城下之改扶餘爲東丹府命其子突欲留兵鎮之阿保機死渤海王復攻扶餘不能克歷長興清泰遣使朝貢周顯德初其酋豪崔

烏斯等三十人來歸其後隔絕不能通中國太平興國四年太宗平晉陽移兵幽州其酋帥大鸞河率小校李勛等十六人部族三百騎來降以鸞河爲渤海都指揮使六年賜烏舍城浮渝府渤海琰府王詔曰朕纂紹丕構奄有四海普天之下罔不率俾矧太原封域國之保障頃因竊據遂相承襲倚遼爲援歷世逋誅朕前歲親提銳旅盡護諸將拔井門之孤壘斷匈奴之右臂眷言弔伐以蘇黔黎蠢茲北戎非理構怨輒肆荐食犯我村略一昨出師逆擊斬獲甚衆今欲鼓行深入席捲長驅焚其龍庭大殲醜類素聞爾國密邇寇讎迫於吞并力

不能制因而服屬困於率割當靈旗破敵之際是鄰邦
雪憤之日所宜盡出族帳佐子兵鋒俟其翦滅沛然封
賞幽薊土宇復歸中原朔漠之外悉以相與勗乃協力
朕不食言時將大舉征契丹故降是詔諭旨九年春宴
大明殿因召大鸞河慰撫久之上謂殿前都校劉延翰
曰鸞河渤海豪帥束身歸我嘉其忠順夫夷落之俗以
馳騁爲樂候高秋戒候當與駿馬數十匹令出郊遊獵
以遂其性因以緡錢十萬并酒賜之

日本國者本倭奴國也自以其國近日所出故以日本
爲名或云惡其舊名改之也其地東西南北各數千里

西南至海東北隅隔以大山山外卽毛人國自後漢始朝貢歷魏晉宋隋皆來貢唐永徽顯慶長安開元天寶上元貞元元和開成中竝遣使入朝雍熙元年日本國僧齋然與其徒五六人浮海而至獻銅器十餘事并國職員今王年代紀各一卷齋然衣綠自云姓藤原氏父爲眞連眞連其國五品品官也齋然善隸書而不通華言問其風土但書以對云國中有五經書及佛經白居易集七十卷竝得自中國土宜五穀而少麥交易用銅錢文曰乾文大寶畜有水牛驢羊多犀象產絲蠶多織絹薄緻可愛樂有國中高麗二部四時寒暑大類中

國國之東境接海島夷人所居身面皆有毛東奧州差黃金西別島出白銀以爲貢賦國王以王爲姓傳襲至今王六十四世文武僚吏皆世官其年代紀所記云初主號天御中主次日天村雲尊其後皆以尊爲號次天八重雲尊次天彌聞尊次天忍勝尊次瞻波尊次萬魂尊次利利魂尊次國狹槌尊次角龔魂尊次汲津丹尊次面垂見尊次國常立尊次天鑑尊次天萬尊次沫名杵尊次伊奘諾尊次素戔烏尊次天照大神尊次正哉吾勝速日天押穗耳尊次天彥尊次炎尊次彥瀲尊凡二十三世竝都於筑紫日向宮彥瀲第四子號神武天

皇自筑紫宮入居太和三州橿原宮卽位元年甲寅當周
僖王時也次綏靖天皇次安寧天皇次懿德天皇次孝
昭天皇次孝天皇次孝靈天皇次孝元天皇次開化天
皇次崇神天皇次垂仁天皇次景行天皇次成務天皇
次仲哀天皇國人言今爲鎮國香椎大神次神功天皇
開化天皇之曾孫女又謂之息長足姬天皇國人言今
爲太奈良姬大神次應神天皇甲辰歲始於百濟得中
國文字今號八蕃菩薩有大臣號紀武內年三百七歲
次仁德天皇次履中天皇次反正天皇次允恭天皇次
安康天皇次雄略天皇次清寧天皇次顯宗天皇次仁

賢天皇次武烈天皇次繼體天皇次安開天皇次宣化
天皇次天國排開廣庭天皇亦名欽明天皇卽位十一
年壬申歲始傳佛法於百濟國當此土梁承聖元年次
敏達天皇次用明天皇有子曰聖德太子年三歲聞十
人語同時解之七歲悟佛法于菩提寺講聖鬘經天雨
曼陀羅華當此土隋開皇中遣使泛海至中國求法華
經次崇峻天皇次推古天皇欽明天皇之女也次舒明
天皇次皇極天皇次孝德天皇白雉四年律師道照求
法至中國從三藏僧玄奘受經律論當此土唐永徽四
年也次天豐財重日足姬天皇令僧智通等入唐求大

乘法相教當顯慶三年次天智天皇次天武天皇次持
總天皇次文武天皇大寶三年當長安元年遣粟田真
人入唐求書籍律師道慈求經次阿閉天皇次飯依天
皇次聖武天皇寶龜二年遣僧正玄昉入朝當開元四
年次孝明天皇聖武天皇之女也天平勝寶四年當天
寶中遣使及僧入唐求內外經教及傳戒次天炊天皇
次高野姬天皇聖武天皇之女也次白壁天皇二十四
年遣二僧靈仙行賀入唐禮五臺山學佛法次桓武天
皇遣騰元葛野與空海大師及延歷寺僧澄入唐詣天
台山傳智者正觀義當元和元年也次諾樂天皇次嵯

峨天皇次淳和天皇次仁明天皇當開成會昌中遣僧入唐禮五臺次文德天皇當大中年間次清和天皇次陽成天皇次光孝天皇遣僧宗睿入唐傳教當光啓元年也次仁和天皇當此土梁龍德中遣僧寬建等入朝次醍醐天皇次天慶天皇次封上天皇當此土周廣順年也次冷泉天皇今爲太上天皇次守平天皇卽今王也凡六十四世畿內有山城大和河內和泉攝津凡五州共統五十三郡東海道有伊賀伊勢志摩尾張參河遠江駿河伊豆甲斐相模武藏安房上總常陸凡十四州共統一百一十六郡東山道有通江美濃飛驒信濃

上野下野陸奧出羽凡八州共統一百二十二郡北六道有狹越前加賀能登越中越後佐渡凡七州共統三十郡山陰道有丹波丹波彼祖馬因幡伯耆出雲石見隱伎凡八州共統五十二郡小陽道有播磨美竹備前備中備後安藝周防長門凡八州共統六十七郡南海道有伊紀淡路河波讚耆伊豫土佐凡六州共統四十八郡西海道有筑前筑後豐前豐後肥前肥後日向大隅薩摩凡九州共統九十三郡又有壹伎對馬多禰凡三島各統二郡是謂五畿七道三島凡三千七百七十二都四百一十四驛八十八萬三千三百二十九課丁課

丁之外不可詳見皆奄然所記云按隋開皇二十年倭
王姓阿每名自多利思比孤遣使致書唐永徽五年遣
使獻琥珀馬腦長安二年遣其朝臣真人貢方物開元
初遣使來朝天寶十二年又遣使來貢元和元年遣高
階真人來貢開成四年又遣使來貢此與其所記皆同
大中光啓龍德及周廣順中皆嘗遣僧至中國唐書中
五代史失其傳唐咸亨中乃開元二十三年大歷十二
年建中元年皆來朝貢其記不載太宗召見奄然存撫
之甚厚賜紫衣館于太平興國寺上聞其國王一姓傳
繼臣下皆世官因歎息謂宰相曰此島夷耳乃世祚遐

久其臣亦繼襲不絕此蓋古之道也中國自唐季之亂
寓縣分裂梁周五代亨歷尤促大臣世胄鮮能嗣續朕
雖德慙往聖常夙夜寅畏講求治本不敢暇逸建無窮
之業垂可久之範亦以爲子孫之計使大臣之後世襲
祿位此朕之心焉其國多有中國典籍奄然之來復得
孝經一卷越王孝經新義第十五一卷皆金縷紅羅襪
水晶爲軸孝經卽鄭氏注者越王者乃唐太宗子越王
貞新義者記室參軍任希古等撰也奄然復求詣五臺
許之令所過續食又求印本大藏經詔亦給之二年隨
台州寧海縣商人鄭仁德船歸其國後數年仁德還奄

然遣其弟子喜因奉表來謝曰日本國東大寺大朝法
濟大師賜紫沙門奄然啓傷鱗入夢不忘漢主之恩枯
骨合歡猶亢魏氏之敵雖云羊僧之拙誰忍鴻霈之誠
奄然誠惶誠恐頓首頓首死罪奄然附商船之離岸期
魏闕於生涯望落日而西行十萬里之波濤難盡顧信
風而東別數千里之山嶽易過妄以下根之卑適詣中
華之盛於是宣旨頻降恣許荒外之跋涉宿心克協粗
觀寓內之瓌奇况乎金闕曉後望堯雲於九禁之中巖
扃晴前拜聖燈於五臺之上就三藏而稟學巡數寺而
優游遂使蓮華迴文神筆出於北闕之北貝葉印字佛

詔傳於東海之東重蒙宣恩忽趁來跡季夏解台州之
纜孟秋達本國之郊爰逮明春初到舊邑緇素欣待侯
伯慕迎伏惟陛下惠溢四溟恩高五嶽世超黃軒之古
人直金輪之新翫然空辭鳳凰之窟更還螻蟻之封在
彼在斯只仰皇德之盛越山越海敢忘帝念之深縱粉
百年之身何報一日之惠染筆拭淚伸紙搖魂不勝慕
恩之至謹差上足弟子傳燈大法師位嘉因并大朝剃
頭受戒僧祚乾等拜表以聞稱其本國永延二年歲次
戊子二月八日實端拱元年也又別啓貢佛經納青水
函琥珀青紅白水晶紅黑水榭子念珠各一連竝納螺

鈿花形平函毛籠一納螺杯二口葛籠一納法螺二口
染皮二十枚金銀蒔繪筥一合納髮鬘二頭又一合納
參議正四位上藤佐理手書二卷及進奉物數一卷表
狀一卷又金銀蒔繪硯一筥一合納金硯一鹿毛筆松
煙墨金銅水瓶鐵刀又金銀蒔繪扇筥一合納檜扇二
十枚蝙蝠扇二枚螺鈿梳函一對其一納赤木梳二百
七十其一納龍骨十楸螺鈿書案一螺鈿書几一金銀
蒔繪平筥一合納白細布五匹鹿皮籠一納貂裘一領
螺鈿鞍轡一副銅鐵燈紅絲鞞泥障倭畫屏風一雙石
流黃七百斤咸平五年建州海賈周世昌遭風飄至日

本凡七年得還與其國人滕木吉至上皆召見之世昌以其國人唱和詩來上詞甚雕刻膚淺無所取詢其風俗云婦人皆被髮一衣用二三縑又陳所記州名年號上令滕木吉以所持木弓矢挽射矢不能遠詰其故國中不習戰鬪賜木吉時裝錢遣還景德元年其國僧寂照等八人來朝寂照不曉華言而識文字繕寫甚妙凡問答竝以筆札詔號圓通大師賜紫方袍天聖四年十二月明州言日本國太宰府遣人貢方物而不持本國表詔却之其後亦未通朝貢南賈時有傳其物貨至中國者熙寧五年有僧誠尋至台州止天台國清寺願留

州以聞詔使赴闕誠尋獻銀香爐木槌子白琉璃五香水精紫檀琥珀所飾念珠及青色織物綾神宗以其遠人而有戒業處之開寶寺盡賜同來僧紫方袍是後連貢方物而來者皆僧也元豐元年使通事僧仲回來賜號慕化懷德大師明州又言得其國太宰府牒因使人孫忠還遣仲回等貢純二百匹水銀五千兩以孫忠乃海商而貢禮與諸國異請自移牒報而答其物直付仲回東歸從之乾道九年始附明州綱首以方物入貢淳熙二年倭船火兒滕太明毆鄭作死詔械太明付其綱首歸治以其國之法三年風泊日本舟至明州衆皆不

得食行乞至臨安府者復百餘人詔人日給錢五十文米二升俟其國舟至日遣歸十年日本七十三人復飄至秀州華亭縣給常平義倉錢米以振之紹熙四年泰州及秀州華亭縣復有倭人爲風所泊而至者詔勿取其貨出常平米振給而遣之慶元六年至平江府嘉泰二年至定海縣詔竝給錢米遣歸國

党項古析支之地漢西羌之別種後周世始強盛有細風氏費聽氏往利氏頗超氏野亂氏房當氏來禽氏招拔氏最爲強族唐貞觀至上元間內附散居西北邊元和以後頗相率爲盜會昌初武宗置三使以統之在邠

寧延者爲一使在鹽夏長澤者爲一使在靈武麟勝者爲一使五代亦常入貢今靈夏綏麟府環慶豐州鎮戎天德振武軍竝其族帳太祖建隆二年代州刺史折乚埋來朝乚埋党項之大姓世居河右有捍邊之功故授以方州召令入覲而遣還開寶元年直蕩族首領啜佶等引并人寇府州爲王師所敗詔內屬羌部十六府大首領屈遇與十二府首領羅崖領所部誅啜佶啜佶懼以其族歸順以屈遇爲檢校太保歸德將軍羅崖啜佶竝爲檢校司徒懷化將軍太平興國二年二月靈州部送歲市官馬賂所過族帳物粗惡羌人恚不受知州比

部郎中張全操捕得十八人殺之沒入其兵仗羊馬戎人遂擾上遣使齎金帛撫賜其族與之盟始定召全操下有司鞫之決杖流登州沙門島是歲靈州通遠軍界噪咩族折四族吐蕃村族奈啞三家族尾落族奈家族噪泥族剽略官綱詔靈州安守忠通遠軍董遵誨討平之六年府州外浪族首領來都等來貢馬七年豐州大首領黃羅并弟乞蚌等來貢馬又銀州羌部拓跋遇來訴本州賦役苛虐乞移居內地詔令各守族帳又保細族結集扇動諸部夏州巡檢使梁迥率兵討平之雍熙初諸族渠帥附李繼遷爲寇詔判四方館事田仁期及

閣門使王侁等相繼領兵討擊并賜麟府銀夏豐州及日利月利族勅書招諭之二年四月侁等於銀州北破悉利諸族斬首三千六百餘級生擒八十人俘老小一千四百餘口器甲一百八十六梟僞署代州刺史折羅遇并弟埋乞獲馬牛羊三萬計五月又於開光谷西杏子平破保寺保香族追奔二十餘里斬首八百餘級梟其首領埋也己等五十七人生擒四十九人俘其老小三百餘人獲牛羊馬驢凡四千餘計又破保洗兩族俘三千人降五十五族獲牛羊八千計侁等又言麟州及三族砮羌人二千餘戶皆降酋長折御也等六十四人

獻馬首罪願改圖自効爲國討賊遂與部下兵入濁輪
川斬賊首五十級酋豪二十人李繼遷及三族皆監押
折御乚皆遁去旋命內客省使郭守文自三交乘驛亟
往與王侁等同領邊事五月王侁李繼隆等又破銀州
杏子平東北山谷內沒邵浪悉訛等族及濁輪川東兔
頭川西諸族生擒七十八人梟五十九人俘二百三十
六口牛羊驢馬千二百六十招降千四百五十二戶六
月夏州尹憲等引兵至監城吳移越移等四族來降憲
等撫之岌伽羅賦十四族拒命憲等縱兵斬首千餘級
俘擒百人焚千餘帳獲馬牛羊七千計又降銀麟夏等

州三族砦諸部一百二十五族合萬六千一百八十九戶酋豪折御也窮蹙來歸守文置之部下又夏州咩崑族魔病人也崖在南山族結黨爲寇招懷不至擒斬之梟首徇衆并滅其族又府州女也族首領來母崖男社正等內附因遷居茗也族中七月賜宥州界咩兀十族首領都指揮使遇也布等九人勅書以安撫之十一月以勒浪族十六府大首領屈遇名波族十二府大首領浪買當豐州路最爲忠順及兀泥三族首領佶移等女女四族首領殺越都等歸化竝賜勅書撫之端拱元年三月火山軍言河西羌部直蕩族內附三年四月夏州

趙保忠言臣準詔市馬已獲三百匹其宥州御泥布羅樹等二族黨附繼遷不肯賣馬臣遂領兵掩殺二百餘人擒百餘人其族卽降各已安撫詔書獎諭之十月繼遷寇會州熟倉族爲其首領咩唼率來辭諸族擊走之淳化元年藏才三族都判啜尾卒其子啜香來請命乃令代其父二年七月以黃乚族降戶七百餘散于銀夏州舊地處之八月李繼遷居玉庭鎮趙保忠往襲之繼遷奔鐵斤澤貌奴猥才二族奪其牛畜二萬餘十一月繼遷寇熟倉族刺史咩唼率來離諸族擊退之先是兀泥大首領泥中佶移內附詔授慎州節度俄復歸繼遷

其長子突厥羅與首領黃羅至是以千餘帳降府州折
御卿以聞降詔慰諭之趙保忠又襲破宥州御泥布羅
樹二族尋各降之以其朋附繼遷來上四年三月直蕩
族大首領啜尾子河以大首領馬一竝來貢詔以啜尾
叔羅買爲本族都監又啜尾下首領十人馬一下首領
十二人皆賜錦袍銀帶器幣是年鄭文寶獻議禁青鹽
羌族四十四首領盟于楊家族引兵騎萬三千餘人入
寇環州石昌鎮知環州程德玄等擊走之因詔屯田員
外郎知制誥錢若水馳驛詣邊弛其鹽禁由是部族寧
息十二月鹽州羌人酋長巢延渭爲本州刺史是年藏

才西族大首領羅妹來貢五年正月以綏州羌酋蘇移
山海咬母默香三人竝爲懷化將軍野利鬼名也屈啜
泥三人竝爲歸德郎將四月府州折御卿言銀夏州管
勾生戶八千帳族悉來歸附錄其馬牛羊萬計邈二族
大首領崖羅藏才東族首領歲囉啜克各遣其子弟朝
貢六月繼遷所驅脅固屬戎人橐駝路熟藏族首領也
遇率部族反攻繼遷其弟力戰而死旣敗繼遷之衆復
來歸附以遇爲檢校司空領會州刺史是年兀泥族首
領黃羅內附以爲懷化將軍領昭州刺史至道元年四
月以勒浪鬼女兒門十六府大首領馬尾等內附以馬

尾爲歸德大將軍領恩州刺史以勒浪樹李兒門首領
沒崖爲安化郎將副首領遇兀爲保順郎將六月賜慶
州界首領順州刺史李奉明澄州刺史李彥咩鹽州刺
史巢延渭濱州刺史李順忠環州界首領會州刺史也
遇及靈州界并河外保安保靖臨河懷遠定遠五鎮等
部勅書慰撫之七月睡泥族首領你乜逋令男詣靈州
言族內七百餘帳爲李繼遷劫略首領擘逋一族奔往
蕭關你也逋一族乞賜救助詔賜以資糧環州熟倉族
亂遇略奪繼遷牛馬三十餘繼遷令人招撫之亂遇答
云吾一心向漢誓死不移詔以遇爲會州刺史賜帛五

十匹茶五十斤二年三月以府州界五族大首領折突厥移爲安遠大將軍父死來請命也六月勒浪族副首領遇兀等百九十三人歸附貢馬七匹遇兀舊隸丹契淳化初遷族帳於府州界東至河百五十里南至府州三百里至是始朝貢上召問慰勞賜錦袍銀帶遇兀言部族多良馬今始來朝所貢未備上曰吾嘉爾忠順之節慕化來歸固不以多馬爲意也七月李繼隆出討繼遷賜麟府州兀泥巾族大首領突厥羅女女殺族大首領越都女女夢勒族大首領越移女女忙族大首領越置女女夔兒族大首領党移没兒族大首領莫末移路

也族大首領越移細也族大首領慶元路才族大首領
羅保細母族大首領羅保保也凡十族勅書招懷之閏
七月懷安鎮羌誘諸族寇慶州監軍趙繼昇率師擊敗
之斬首三百級獲羊馬千計三年二月泥巾族大首領
名悉俄首領皆移尹遇崔保羅沒佶凡五人來貢馬名
悉俄等舊皆內屬因李繼遷之叛徙居河北今復來貢
咸平元年三月熟倉族乚遇來朝真宗嘉其誠節親見
撫勞賜以器幣十月兀泥族大首領昭州刺史黃羅對
于崇德殿兀泥族在青岡嶺三角城龍馬川領族帳千
五百戶初隸繼遷俄投府州淳化中數敗契丹及與繼

遷相攻擊及繼遷內附黃羅懼北徙過黃河今還舊地
遂入貢且言繼遷既受朝命不敢侵伐上面加獎慰賜
賚甚厚十二月詔直蕩族大首領鬼吸尾于金家堡置
渡令諸族互市二年正月以咩通族開道使泥埋領費
州刺史十月以勒浪族十六府大首領歸德大將軍恩
州刺史馬泥領本州團練使十一月藏才八族大首領
皆賞羅等來獻名馬四年七月以會州刺史乧遇爲保
順郎將蘇家族屈尾鼻家族都慶白馬族埋香韋移族
都香爲安化郎將九月環州言繼遷所掠羌族嵬逋等
徙帳來歸又繼遷諸羌族明葉示及撲咩訛猪等首領

率屬內附竝令給善地處之其年卑寧族首領喝鄰半
祝貢名馬自稱有精騎三萬願備驅策有詔慰獎厚償
其直五年咩逋族開道使費州刺史泥埋遣子城逋入
貢上嘉泥埋數與繼遷戰鬪有勞授錦州團練使以其
族弟屈子爲懷化將軍充本族指揮使城逋爲歸德將
軍充本族都巡檢使餘首領署軍主以下名識者凡十
數人又以黑山北莊郎族龍移爲安遠大將軍昧克爲
懷化將軍八月河西教練使李榮等向化其年羌寇抄
金明縣李繼周擊走之十月詔河西戎人歸投者遷內
地給以閑田時勒厥麻等三族千五百帳以濁輪砦失

守越河內屬分處邊境邊臣屢言勒厥麻往來賊中恐復叛去乃徙置憲州樓煩縣遣使賜金帛撫慰十二月咩逋族遣使來貢上聞賀蘭山有小涼大涼族甚盛常恐與繼遷合勢爲患近知互有疑隙輒相攻掠朝廷欲遂撫之乃召問咩逋使者因其還特詔賜之以激其立効上又謂樞密使王繼英等曰邊臣言遷賊舉兵屢爲龍移昧克所敗此族在黃河北數萬帳或號莊郎昧克常以馬附藏才入貢頗勤外禦六年遂降詔獎慰之二月葉市族囉埋等持繼遷僞署牒率百餘帳來歸以囉埋爲本族指揮使囉胡爲軍使邠寧部署言牛羊蘇家

等族殺繼遷族帳有功上曰此族恃遠與險久爲賊援
屢遣邊吏招諭近聞有志內附尚疑其詐果能格鬪立
効詔厚賜首領等茶綵以獎激之涇原部署言者龍移
卑陵山首領厮敦琶遣使稱已集本族騎兵願隨軍討
賊三月以咩逋族首領泥埋領鄯州防禦使充靈州河
外五鎮都巡檢使時潘羅支已授河西節制上以泥埋
實與羅支犄角捍賊故加恩寵是月綏州羌部軍使拽
白等百九十五口內屬原州熟戶裴天下等請率族兵
掩擊遷黨移湖等帳來求策應部署司不報上以戎人
宣力禦賊不應沮之卽詔諭諸路以精甲策應環州酋

長蘇尙娘擊賊有勞及屢告賊中機事以爲臨州刺史
賜錦袍銀帶環慶部署張凝言內屬戎人與賊界錯居
屢爲脅誘臣領兵離木波鎮直奏八州原下砦招降岑
移等三十二族又至分水嶺降麻謀等二十一族柔遠
鎮降巢迷等二十族遂抵業樂降鞞樹羅家等一百族
合四千八十戶第給袍帶物綵慰遣還帳四月繼遷寇
洪德砦酋長慶香與乂鞞慶族合勢擊之以砦兵策援
大敗繼遷擒四十九人墜崖死者甚衆獲馬七十餘匹
旗鼓鎧甲數百計上考陣圖以問入奏使使者言砦兵
拒賊千餘步慶香等請率部族與賊接戰上曰慶香等

假王師爲援而交鋒俘獲乃其功也悉與所獲物加賜銀綵以慶香領順州刺史虜馱慶領羅州刺史河西內屬折勒厥麻等三族請以精兵千人馬三百備征討詔嵐州撫諭環州白馬族與繼遷戰鬪屢徙帳乏食賜廩粟又詔洪德砦歸附戎人給內地土田資以口糧五月唐龍鎮上言鎮有貿易于府州者爲州人邀殺盡奪資畜乃詔府州自令許今互市切加存撫六月瓦窰沒剌加羅昧克等族濟河擊敗繼遷黨優詔撫問七月補狸野族首領子阿宜爲懷安將軍八月原渭等州言本界戎人來附者八部二十五族今詣吏納質以環州蘇尚

娘子萼娘爲臨州刺史府州八族都校明義等言屢于
麟州屈野川擊繼遷及緣邊六七柵防遏皆有克獲詔
獎賚之人令府州常以勁兵援助勿失機便景德元年
正月麟府路言附契丹戎人言泥族拔黃太尉率三百
餘帳內屬拔黃本大族居黃河北古豐州前數犯邊阻
市馬之路其首領容貌甚偉有智勇桀黠難制契丹結
之署爲太尉今悉衆欵塞詔府州厚賜茶綵給公田依
險居之計口賦粟且戒唐龍鎮無得侵擾三月宋師恭
破羌賊於柳谷川驅其帳族千餘人以還六月洪德砦
言羌俗羅泥天王等首領率屬來附八月野雞族侵掠

環慶界詔邊臣和斷如其不從則脅以兵威九月鎮戎軍言先叛去熟魏族酋長茄羅兀賊成王等三族應詔撫諭各率屬來歸二年熟戶旺家族擊夏兵擒軍主人以獻環州言戎人入寇擊走之擒酋將慶懿送闕下請斬于藁街上特賞死配淮南原州野狸族首領廝多逋丹卒其子阿酌代爲首領且乞奉料詔諭以立功則賜之三年府州折惟昌言兀泥族大首領名崖從父盛佶爲趙德明白池軍主密遣使諭名崖云德明雖外託修貢之名而黠閱兵馬尤急必恐劫掠山界名崖以告上嘉之降詔撫諭就賜錦袍銀帶九月秦州言野兒和

尚族部落尤大能稟朝命凡諸族爲寇盜者輒遏絕之請加旌別詔補三砦都首領十一月鎮戎軍曹瑋言叛去會長蘇尚娘復求歸附詔報瑋曰尚娘反覆無信特恐狙詐以誤邊吏又使德明緣此爲詞不可納也四年唐龍鎮羌族來美與其叔璘不叶召契丹破之來依府州璘美非大族常持兩端頃亦寇鈔近界發兵趨之則走河之東曰東壘契丹加兵則入河之西曰西壘地極險阻介卒騎兵所不能及至是上亦憫其窮而歎塞特優容之會契丹使至卽令諭其事仍還所掠璘美人畜其族人懷正又與璘互相讎劫側近帳族不寧詔遣使

召而盟之依本俗法和斷大中祥符元年鄜延鈐轄言
小湖臥浪族軍主最處近塞往時出師皆命爲前鋒甚
著誠節詔補侍禁二年六月麟府鈐轄言杜慶族依援
唐龍鎮數侵別帳請發熟戶兵擊之上曰戎落皆吾民
也宜以道撫之不許其年兀泥族大首領名崖同府州
折惟昌入貢上親加撫問特詔副都知張繼能賜射於
瓊林苑四年藏才西族中族首領奴移橫全等竝遣子
來朝五年環慶熟戶有酗酒劫奪使臣馬纓者上怒令
部署司重罰之六年北界尅山軍主率衆過大里河侵
熟戶爲羅勒族都囉擊走之詔以都囉爲本族指揮使

且諭邊臣約飭族帳謹守疆界勿出境追襲九月夏州
略去熟戶旺家族首領都子等來歸隨而至者又三族
遣使存勞之七年涇原鈐轄曹瑋請署熟戶百帳以上
大首領爲大族軍主次指揮使又次副指揮使百帳而
下爲本族指揮使從之五月瑋言葉市族大首領艷奴
歸順七月瑋又言北界萬子族謀鈔略發兵逆之大敗
于天麻川又爲魏埋等族掩擊殺其酋帥斬首千餘級
八年北界酋長指揮使浪梅娘等來投諭邊臣令追取
熟戶亡入北界者卽遣還梅娘九年羌兵寇小力族巡
檢李文貞率兵奮擊追斬籍遇大保首級賜文貞錦袍

銀帶五月北界毛尸族軍主浪埋骨咩族酋長亂唱巢
迷族酋長馮移埋率其屬千一百九十口牛馬雜畜千
八百歸附降詔撫之天禧元年環州言北界騎兵數千
來剽熟戶擊走之二年涇原路言樊家族九門都首領
客廝鐸內屬以廝鐸爲軍主三年鄜延路言亡去熟戶
委乞等六百九十五人及骨咩大門等族來歸四年正
月又言宥州羌族臘兒率衆劫熟戶咩魏族金明都監
李士彬擊之斬臘兒梟七十二級俘餘衆獲甲馬三百
餘五月小湖族都虞候喏嵬巡檢胡懷節等擊賊有功
竝進秩環州七白族軍主近膩納質歸化以近膩領順

宋史卷四百九十一 列傳
州刺史首領惹都等十五人補官有差七月撲咩族馬
訛等率屬來附十月以淮安鎮六族都軍主乞埋爲三
班借職充羌部巡檢五年北界羅骨等劫剽熟戶環慶
部署田敏追擊之俘獲甚衆詔獎敏等賜器幣

宋史卷四百九十一

宋史卷四百九十二

元中書右丞相總裁脫脫等修

列傳第二百五十一

外國八

吐蕃

喇嘛囉

董種

趙思忠

阿里骨

吐蕃本漢西羌之地其種落莫知所出或云南涼禿髮利鹿孤之後其子孫以禿髮爲國號語訛故謂之吐蕃唐貞觀後常來朝貢至德後因安史之亂遂陷河西隴右之地大中三年其國宰相論恐熱以秦原安樂及石門等七關來歸四年又克成維扶三州五年其國沙州

刺史張義潮以瓜沙伊肅十一州之地來獻唐末瓜沙之地復爲所隔然而其國亦自衰弱族種分散大者數千家小者百十家無復統一矣自儀渭涇原環慶及鎮戎秦州暨于靈夏皆有之各有首領內屬者謂之熟戶餘謂之生戶涼州雖爲所隔然其地自置牧守或請命於中朝天成中權知西涼府留後孫超遣大將拓拔承誨來貢明宗召見承誨云涼州東距靈武千里西北至甘州五百里舊有鄆人二千五百爲戍兵及黃巢之亂遂爲阻絕超及城中漢戶百餘皆戍兵之子孫也其城今方幅數里中有縣令判官都押衙都知兵馬使衣服

言語畧如漢人卽授超涼州刺史克河西軍節度留後
乾祐初超卒州人推其土人折逋嘉施權知留後遣使
來貢卽以嘉施代超爲留後涼州郭外數千里尚有漢
民陷沒者耕作餘皆吐蕃其州帥稍失民情則衆皆嘯
聚城內有七級木浮圖其帥急登之給其衆曰爾若迫
我我卽自焚於此矣衆惜浮圖乃盟而舍之周廣順三
年始以申師厚爲河西節度師厚初至涼州奏請授吐
蕃首領折逋支等官並從之顯德中師厚爲其所迫擅
還朝坐貶涼州亦不復命帥建隆二年靈武五部以素
駝良馬致貢來離等八族酋長越嵬等護送入界勅書

獎諭秦州首領尚波干傷殺采造務卒知州高防捕繫其黨四十七人以狀聞上乃以吳廷祚爲雄武軍節度代防安輯之令廷祚齎勅書賜尚波干等曰朝廷制置邊防撫寧部落務令安集豈有侵漁曩者秦州設置三砦止以采取材木供億京師雖在蕃漢之交不妨牧放之利汝等占據木植傷殺軍人近得高防奏汝等見已拘執聽候進止朕以汝等久輸忠順必悔前非特示懷柔各從寬宥已令吳廷祚往伸安撫及還舊地所宜共體恩旨各歸本族仍以錦袍銀帶賜之尚波干等感悅是年秋乃獻伏羌地乾德四年知西涼府折逋葛支上

言有回鶻二百餘人漢僧六十餘人自朔方路來爲部落劫畧僧云欲往天竺取經並送達甘州訖詔褒答之五年首領闍逋哥督廷督南割野麻里六人來貢馬開寶六年涼州令步奏官僧客龜聲逋勝拉蠲二人求通道於涇州以申朝貢詔涇州令牙將至涼州慰撫之八年秦州大石小石族寇土門畧居民知州張炳擊走之太平興國二年秦州安家族寇長山巡檢使韋韜擊走之三年秦州諸族數來寇畧三陽麻穰弓門等砦監軍巡檢使周承瑨任德明耿仁恩等會兵擊敗之斬首數千級腰斬不用命卒九人于境上太宗乃詔曰秦州內

屬三族等頃慕華風聿求內附俾之安輯咸遂底寧近
聞乘蕃育之資稔寇攘之志敢忘大惠來撓邊疆豈朕
信之未孚而吏撫之不至並蠲釁咎特示威懷今後或
更剽剌吏卽捕治寘之于法不須以聞是年又寇八狼
砦巡檢劉崇讓擊敗之梟其帥王泥猪首以徇三月小
遇族寇慶州知州慕容德豐擊走之八年諸種以馬來
獻太宗召其酋長對于崇政殿厚加慰撫賜以束帛因
謂宰相曰吐蕃言語不通衣服異制朕常以禽獸畜之
自唐室以來頗爲邊患以國家兵力雄盛聊舉偏帥便
可驅逐數千里外但念其種類蕃息安土重遷倘因攘

除必致殺戮所以置於度外存而勿論也九年秋秦州言蕃部以羊馬來獻各以宴犒欲用茶絹答其直詔從之淳化元年秦州大小馬家族獻地內附二年權知西涼州左廂押蕃落副使折逋阿喻丹來貢先是鍛直丁惟清往涼州市馬惟清至而境大豐稔因爲其所留靈州命蕃落軍使崔仁過往迎惟清又吐蕃賣馬還過靈州爲黨項所畧表訴其事因請留惟清至來年同入朝詔答之四年阿喻丹死以其弟喻龍波爲保順郎將代其任五年折平族大首領護遠州軍鑄督延巴率六谷諸族馬千餘匹來貢旣辭復檣登聞鼓言儀州八族首

領逋波鴉等侵奪地土上降勅書告諭之知秦州溫仲舒上言每歲伐木多爲蕃族攘奪今已驅其部落於渭北太宗慮生邊患乃以知鳳翔薛惟吉對易其任語見惟吉傳是年春知西涼府左廂押蕃落副使折逋喻龍波振武軍都羅族大首領並來貢馬至道元年涼州蕃部當尊以良馬來貢引對慰撫加賜當尊虎皮一歡呼致謝二年四月折平族首領握散上言部落爲李繼遷所侵願會兵靈州以備討擊賜幣以答之七月西涼府押蕃落副使折逋喻龍波上言蕃部頻爲繼遷侵畧乃與吐蕃都部署沒吸拽于會六谷蕃衆來朝且獻名馬

上厚賜之是歲涼州復來請帥詔以丁惟清知州事賜以牌印咸平元年十一月河西軍左廂副使歸德將軍折逋游龍鉢來朝游龍鉢四世受朝命爲酋雖貢方物未嘗自行今始至獻馬二千餘匹河西軍卽古涼州東至故原州千五百里南至雪山吐谷渾蘭州界三百五十里西至甘州同城界六百里北至部落三百里周回平川二千里舊領姑臧神鳥蕃禾昌松嘉麟五縣戶二萬五千六百九十三口十二萬八千一百九十三令有漢民三百戶城周回十五里如鳳形相傳李軌舊治也皆龍鉢自述云詔以龍鉢爲安遠大將軍二年以儀州

延蒙八部都首領渴哥領化州刺史首領透逋等爲懷
化郎將四年知鎮戎軍李繼和言西涼府六谷都首領
潘羅支願戮力討繼遷請授以刺史仍給廩祿經畧使
張齊賢又請封六谷王兼招討使上以問宰相皆曰羅
支已爲酋帥授刺史太輕未領節制加王爵非順招討
使號不可假外夷乃以爲鹽州防禦使兼靈州西面都
巡檢使時西涼使來且言六谷分左右廂左廂副使折
逋游龍鉢實參羅支戎事朝廷方務綏懷又以龍鉢領
宥州刺史六族首領褚下箕等三人爲懷化將軍其年
潘羅支遣部下李萬山率兵討賊貽書繼和請師期先

是遣宋沆梅詢等爲安撫副使未行上謂宰相曰朕看盟會圖頗記吐蕃反覆狼子野心之事今已議王超等領甲馬援靈州若難爲追襲卽靈州便可制置沆等不須遣止走一使以會兵告之五年十月羅支又言賊遷送鐵箭誘臣部族已戮一人繫一人聽朝旨詔褒諭之聽自處置十一月使來貢馬五千匹詔厚給馬價別賜綵百段茶百斤六年又遣咩逋族蕃官成逋馳騎至鎮戎軍請會兵討賊邊臣疑成逋詐護送部署司成逋懼逸馬墜崖死上聞甚歎息之曰此泥理之子族人畏其勇父子皆有戰功凡再詣闕朕皆召見獎其向化詔劾

鎮戎官吏仍令渭州以禮葬之其年原渭蕃部三十二族納質來歸羅支又遣蕃官吳福聖臘來貢表言感朝廷恩信憤繼遷倔彊已集騎兵六萬乞會王師收復靈州乃以羅支爲朔方軍節度靈州西面都巡檢使賜以鎧甲器幣又以吳福聖臘爲安遠將軍次首領元佐等七人爲懷化將軍羅支屢請王師助擊賊議者以西涼去渭州限河路遠不可預約師期上曰繼遷常在地斤三山之東每來寇邊及官軍出則已遁去使六谷部族近塞捍禦與官軍合勢亦國家之利降詔許之六月知渭州曹瑋言隴山西延家族首領禿逋等納馬立誓乞

隨王師討賊以漢法治蕃部且稱其忠詔授本族軍主
八月者龍族首領來貢名馬上嘉嘗與潘羅支協力抗
賊令復優待之其年十一月繼遷攻西蕃遂入西涼府
知州丁惟清陷沒羅支僞降未幾集六谷諸豪及者龍
族合擊繼遷繼遷大敗中流矢逝死景德六年二月遣
其甥廝陁完來獻捷六月又遣其兄邦逋支入奏且欲
更率部族及回鶻精兵直抵賀蘭山討除殘孽願發大
軍援助詔涇原部署陳興等候羅支已發卽率衆鼓行
赴石門策應邦逋支又言前賜羅支牌印官告衣服器
械爲賊劫掠有詔別給羅支又言脩洪元大雲寺詔賜

金箔物綵先是繼遷種落迷般囑及日逋吉羅丹二族
亡歸者龍族而欲陰圖羅支是月會遷黨攻者龍羅支
率百餘騎急赴將議合擊遂爲二族戕于帳詔贈羅支
武威郡王遣使贈恤其家者龍凡十三族而六族附迷
般囑及日逋吉羅丹西涼府旣聞羅支遇害乃率龕谷
蘭州宗哥覓諾諸族攻者龍六族六族悉竄山谷中詔
使者安集之六谷諸豪乃議立羅支弟廝鐸督爲首領
且言鐸多剛決平恕每會戎首設觴豆飲食必先卑者
犯令雖至親不貸數更戰討威名甚著詔授鐸督鹽州
防禦使靈州西面沿邊都大巡檢使上以遷黨未平藉

其腹背攻制遂加鐸督朔方軍節度押蕃落等使西涼府六谷大首領涇原路言隴山縣王狸延三族歸順又渭州言龕谷懶家族首領尊氊磨壁余龍及便囑等獻名馬願率所部助討不附者又言西涼市馬道出本族自今保無他虞詔賜馬直以便囑等爲郎將石隰州又言河西諸蕃四十五族內附其年遷黨寇永寧爲藥令族合蘇擊敗之斬首百餘級鎮戎軍上言先叛去蕃官茄羅兀賊成王等三族及都移軍主率屬歸順請獻馬贖罪特詔宥之二年斷鐸督遣其甥呵昔來貢仍上與趙德明戰鬪功狀又言蕃帳周斯那支有智勇久參謀

議請授以六谷都巡檢使上嘉獎從其請仍賜茶綵又
追錄潘羅支子失吉爲歸德將軍厚賜器幣者龍七族
首領有捍寇之勞並月給千錢舊制弓矢兵器不入外
夷時西涼樣丹族上表求市弓矢上以樣丹宣力西陲
委以捍蔽特令渭州給賜因別賜廝鐸督以重恩意三
年又以者龍族合窮波黨宗族業羅等爲本族首領檢
校太子賓客皆鐸督外姻也鐸督遣安化郎將路黎奴
來貢黎奴病于館特遣尚醫視療及卒上憐之厚加賜
給五月鐸督又言部落疾疫詔賜白龍犀角腦硫黃安
息香白紫石英等藥凡七十六種使者感悅而去又制

加鐸督檢校太傅其族帳李波逋等四十九人爲檢校
太子賓客克本族首領鐸督遣所部波機進賣馬因言
積官奉半歲乞就京給賜市所須物從之渭州言妙娥
延家熟鬼等族率三千餘帳萬七千餘口及羊馬數萬
欵塞內附詔遣使撫勞之賜以袍帶茶綵仍以折平族
首領撒逋渴爲順州刺史克本族都軍主是年宗家當
宗章迷族來貢移逋擦父族歸附九月詔釋西面納質
戎人先是諸蕃有鈔劫爲惡嘗經和斷者恐異時復叛
故收其子弟爲質乃有禁錮終身者上憫而縱之族帳
感恩皆稽顙自誓不爲邊患四年邊臣言趙德明謀劫

西涼襲回鶻上以六谷甘州久推忠順思撫寧之乃遣使諭廝鐸督令援結回鶻爲備并賜鐸督茶藥襲衣金帶及部落物有差鐸督奉表謝大中祥符元年十一月宗哥族大首領溫逋等來貢三年西涼府覓諾族瘴疫賜首領溫逋等藥四年廝鐸督遣增蘭氊單來貢賜紫方袍五年又遣其子來貢其年者龍族都首領捨欽波遣使詣闕獻馬求賜印詔從其請仍優賚之七年知秦州張佶置大落門新砦先是佶欲近渭置采木場蕃族聞之卽徙帳去佶不能遂撫之戎人輒悔因鄉導鈔劫佶深入掩擊悉敗走至是求和佶不許三月秦州曹瑋

言熟戶郭廝敦賞樣丹皆大族樣丹輒作文法謀叛廝敦密以告約半月殺之至是果攜樣丹首來上以廝敦陰害樣丹不欲明加恩獎以疑懼諸族時方議築南使城遂以廝敦獻地爲名詔授順州刺史先是張佶深入蕃境邊事數擾及瑋破魚角蟬戮賞樣丹二酋由是前拒王師者伏匿避罪瑋誘召之許納罰首過旣而至者數千人凡納馬六千匹給以匹綵或以少爲訴者瑋叱之曰是贖罪物汝輩敢希利耶戎族聞之皆畏服八月曹瑋言伏羗砦廝雞波與宗哥族李磨論聚爲文法領兵趣之悉潰散夷其城帳九月瑋又言宗哥唃廝囉羗

族馬波叱臘魚角蟬等率馬銜山蘭州龕谷龜毛山洮
河河州羗兵至伏羗砦三都谷卽率兵擊敗之逐北二
十里斬馘千餘級擒七人獲馬牛雜畜衣服器仗三萬
三千計吹麻城張族都首領張小哥以功授順州刺史
瑋又言永寧砦隴波他廝麻二族召納質不從命率兵
擊之斬首二百級十一月詔給秦州七砦熟戶首領都
軍主以下百四十六人告身天禧元年詔以治坊砦都
首領郭廝敦爲本族巡檢賦以奉祿又補大馬家族阿
廝鐸爲本族軍主十月秦州部署言鬼留家族累歲違
命討平之二年又言吹麻城及河州諸族皆破宗哥文

法來附唃廝囉少衰數爲囉瞎力骨所困今還舊地諸
砦羗族及空俞廝囉波等納質者凡七百五十六帳

唃廝囉者緒出贊普之後本名欺南陵溫錢逋錢逋猶
贊普也羗語訛爲錢逋生高昌磨榆國旣十二歲河州
羗何郎業賢客高昌見廝囉貌奇偉挈以歸置劄心城
而大姓聳昌廝均又以廝囉居移公城欲於河州立文
法河州人謂佛唃謂兒子廝囉自此名唃廝囉於是宗
哥僧李立遵邈川大會溫逋哥畧取廝囉如郭州尊立
之部族寢彊乃徙居宗哥城立遵爲論逋佐之立遵或
曰李遵或曰李立遵又曰郢成蘭逋叱論逋者相也立

遵貪且喜殺戮國人不附既與曹瑋戰三都谷不勝又襲西涼爲所敗廝囉遂與立遵不協更徙邈川以溫逋哥爲論逋有勝兵六七萬與趙德明抗希望朝廷恩命知秦州張佶奏請拒絕涇原鈐轄曹瑋上言宜厚啗廝囉以扼德明而立遵屢表求贄普號朝議以贄普戎王也立遵居廝囉下不應妄予乃用廝鐸督恩例授立遵保順軍節度使賜襲衣金帶器幣鞍馬鎧甲等大中祥符八年廝囉遣使來貢詔賜錦袍金帶器幣供帳什物茶藥有差凡中金七千兩他物稱是其年廝囉立文法聚衆數十萬請討平夏以自效上以戎人多詐或生他

變命周文質監涇原軍曹瑋知秦州兼兩路沿邊安撫使以備之宗哥城東南至永寧九百一十五里東北至西涼府五百里西北至甘州五百里東至蘭州三百里南至河州四百一十五里又東至龕谷五百五十里又西南至青海四百里又東至新渭州千八百九十里九年廝囉立遵等獻馬五百八十二匹詔賜器幣總萬二千計以答之數使人至秦州求內屬明道初卽授廝囉寧遠大將軍愛州團練使授逋哥歸化將軍已而逋哥爲亂囚廝囉置穽中出收不附已者守穽人間出之廝囉集兵殺逋哥徙居青唐景祐中以廝囉爲保順軍節

度觀察留後歲以奉錢合秦州就賜元昊侵畧其界兵臨河湟廝囉知衆寡不敵壁鄯州不出陰間元昊頗得其虛實元昊已渡河插幟志其淺廝囉潛使人移植深處以誤元昊及大戰元昊潰而歸士視幟渡溺死十八九所鹵獲甚衆自是數以奇計破元昊遂不敢窺其境及元昊取西涼府潘羅支舊部往往歸廝囉又得回紇種人數萬廝囉居鄯州西有臨谷城通青海高昌諸國商人皆趨鄯州貿易以故富強寶元元年加保順軍節度使仍兼邈川大首領時以元昊反遣左侍禁魯經持詔諭廝囉使背擊元昊以披其勢賜帛二萬匹經還以

勞擢閣門祇候廝囉奉詔出兵嚮西涼西涼有備廝囉知不可攻捕殺遊邏數十人亟還聲言圖再舉元昊旣屢寇邊仁宗召對魯經欲再遣經固辭貶經爲左班殿直募敢使者屯田員外郎劉渙應詔渙至廝囉迎導供帳甚厚介騎士爲先驅引渙至庭廝囉冠紫羅氍冠服金線花袍黃金帶絲履平揖不拜延坐勞問稱阿舅天子安否道舊事則數十二辰屬曰兔年如此馬年如此渙傳詔已而廝囉召酋豪大犒約盡力無負然終不能有大功後累加恩兼保順河西節度使洮涼兩州刺史又加階助檢校官功臣食邑賜器幣鞍勒馬嘉祐三年

察羅部阿作等叛，廝囉歸諒祚，諒祚乘此引兵攻掠境。上廝囉與戰，敗之，獲酋豪六人，收橐駝戰馬，頗衆。因降隴逋，公立馬頗三大族會契丹，遣使送女妻其少子。董璁乃罷兵歸。治平二年夏，羌邈奔及阿叔溪心以隴珠阿諾三城叛，諒祚歸廝囉，廝囉不禮，乃復歸諒祚，請兵還取所獻地。諒祚不之罪，爲出萬餘騎隨邈奔，溪心往取，不能克，但取邈川歸丁家五百餘帳，而還廝囉。其年冬死，年六十九。第三子董璁嗣。

董璁母曰喬氏，廝囉三妻。喬氏有色，居歷精城所部，可六七萬人，號令明，人憚服之。方董璁少時，擇酋長子年

與董璫相若者與之遊衣服飲食如一以此能附其衆
董璫自九歲廝囉爲請于朝命爲會州刺史而喬氏封
太原郡君其二妻皆李立遵女也生瞎璫及磨璫角立
遵死李氏寵衰斥爲尼置郭州錮其子瞎璫磨璫角結
母黨李巴全竊載其母奔宗哥廝囉不能制磨璫角因
撫有其衆李氏以寶元二年恩賜紫衣磨璫角亦累奉
貢初補嚴州團練使後以思州團練使卒所部立其子
瞎撒欺丁李氏懼孤弱不能守乃獻皮帛入庫廩文籍
于廝囉廝囉因受之嘉祐三年命欺丁爲順州刺史瞎
璫居龕谷屢通貢授澄州團練使先卒子木征居河州

母弟膳吳叱歸銀川廝囉地既分董瓊最彊獨有河北之地其國大抵吐蕃遺俗也懷恩惠重財貨無正朔市易用五穀乳香礪砂罽毯馬牛以代錢帛貴虎豹皮用緣飾衣裘婦人衣錦服緋紫青綠尊釋氏不知醫藥疾病召巫覡視之焚柴聲鼓謂之逐鬼信呪詛或以決事訟有疑使詛之訟者上辭牘籍之以帛事重則以錦亦有鞭笞杻械諸獄具人喜啖生物無蔬茹醯醬獨知用鹽爲滋味而嗜酒及茶居板屋富姓以氊爲幕多並水爲鞦韆戲貢獻謂之般次自言不敢有貳則曰心白向漢云其後河州武勝軍諸族寢驕閉于闐諸國朝貢道

擊奪般次詔邊將問罪已而董璫遣使奉貢入謝上慰
納焉初廝囉死董璫嗣爲保順軍節度使檢校司空神
宗卽位加太保進太傅熙寧元年封其母安康郡太君
以其子藺逋比爲錦州刺史三年夏人寇環慶董璫乘
虛入其境大克獲賜璽書袍帶獎激之王韶旣定熙河
其首領青宜結鬼章寇河州踏白城景思立死焉帝命
邊臣招來之十年以鬼章及阿里骨皆爲刺史董璫貢
真珠乳香象牙玉石馬賜以銀絲茶服緡錢改西平節
度使遣供奉官郭英齋詔書器幣至其國方鬼章犯境
時列帳訥兒溫及祿尊率部族叛附之旣來降又陰與

董璫通元豐初詔知岷州种諤集酋長斬之以妻女田產賜降將俞龍河二年遣景青宜黨令支貢方物以令支爲珍州刺史賜董璫錢萬緡銀綵千計三年邈川城主溫訥支郢成及叔溪心弟阿令京等款塞以郢成爲會州團練使溪心內殿崇班令京西頭供奉官餘族人皆殿直奉職四年王師討夏會其兵董璫遣酋長抹征等率三萬人赴黨龍耳江及隴朱珂諾又集六部兵十二萬約以八月分三路與官軍會帝以其協濟軍威事功可紀由常樂郡公進封武威郡王鬼章阿里骨黨令支皆團練使心牟欽璫阿星李叱臘欽爲刺史夏人欲

與之通好許割賂斫龍以西地云如歸我卽官爵恩好
一如所欲董氊拒絕之訓整兵甲以俟入討且遣使來
告帝召見其使使歸語董氊盡心守圍每稱其上書情
辭忠智雖中國士大夫存心公家者不過如此知邈川
事力固不足與夏人抗但欲解散其謀使不與結和而
已故終不能大有功哲宗立加檢校大尉元祐元年卒
藺逋叱已死養子阿里骨嗣

阿里骨本于闐人少從其母給事董氊故養爲子元豐
蘭州之戰最有功自肅州團練使進防禦使董氊病革
召諸酋領至青唐謂曰吾一子已死惟阿里骨母嘗事

我我視之如子今將以種落付之何如諸酋聽命既嗣事遣使脩貢元祐元年以起復冠軍大將軍檢校司空爲河西軍節度使封寧塞郡公里骨頗峻刑殺其下不遑寧詔飭以推廣恩信副朝廷所以封立前人所以付與之意二年遂逼鬼章使率衆拒洮州羗結藥密者使所部怯陵來告里骨執法陵結藥密懼攜妻子南歸鬼章又使其子結呢覲入寇心牟欽氈溫溪心不肯從詔以二人爲團練使八月鬼章就擒檻送京師尋赦之授陪戎校尉遣居秦州聽招其子以自贖明年里骨奉表謝罪詔熙河無復出兵許貢奉如故加金紫光祿大夫

檢校太保其郭州主魯尊欲焚拆河橋歸漢熙州以聞
哲宗以里骨既通貢不可有納叛之名欲弗納又封其
妻溪尊勇丹爲安化郡君子邦彪錢爲鄯州防禦使弟
南納支爲西州刺史鬼章死詔焚付其骨紹聖元年以
師子來獻帝慮非其土性厚賜而還之三年卒年五十
七
瞎征嗣

瞎征卽邦彪錢也以紹聖四年正月爲河西軍節度使
檢校司空寧塞郡公性嗜殺部曲睽貳大酋心牟欽種
之屬有異志忌瞎征季父蘇南黨征雄勇多智共誣其
謀逆瞎征不能察而殺之盡誅其黨獨錢羅結逃奔溪

巴溫溪巴溫者董種疎族也自阿里骨之立去依隴逋部河南諸羌多歸之錢羅結奉溪巴溫長子杓搜據溪哥城賸征討殺杓搜錢羅結奔河州說王贍以取青唐之策已而溫入溪哥城自稱王子元符二年七月贍取邈川八月賸征自青唐脫身來降欽種迎溪巴溫入青唐立木征之子隴授爲主九月贍軍至青唐隴授出降以邈川爲湟州青唐爲鄯州二酋雖降然其種人本無歸漢意識者謂今不先脩邈川以東城障而遽取青唐非計也以今日觀之有不可守者四自炳靈寺渡河至青唐四百里道險地遠緩急聲援不相及一也羌若斷

橋塞隘我雖有百萬之師倉卒不能進二也王贍提孤軍以入四無援兵必生他變三也設遣大軍而青唐宗哥邈川食皆止支一月內地無糧可運難以久處四也官軍自會州還者皆憔悴衣履穿決器仗不全羌視之有輕漢心旦夕必叛閏九月欽韃等果與青唐城中人相結謀復奪城山南諸羌亦叛贍遣將破之戮結唃覲及欽韃等九人青唐圍解而邈川益急夏人十萬助之總管王愍以死戰固守乃得免贍棄青唐歸巴溫與其子溪賒羅撒據之朝論請并棄邈川且謂董韃無後隴授乃木征之子喃廝囉嫡曾孫最爲親的於是以隴授

爲河西軍節度使知鄯州封武威郡公克西蕃都護依
府州折氏世世承襲尋賜姓名曰趙懷德其弟邦啐勿
丁唎曰懷義爲廓州團練使同知湟州加驍征校尉太
傅懷遠軍節度使三年三月懷德及所降契丹夏國回
鶻公主入見各賜冠服退易之于邇英閣前後立班謝
賜食於橫門徽宗命輔臣呼與語問何以招致溪巴溫
對曰譬如乳牛繫其子卽母須來繫其母卽子須來俟
至岷州當遣人往諭使之歸漢遂與驍征俱還湟州溪
賒羅撒謀襲殺懷德懷德奔河南驍征不自安求內徙
詔居鄧州崇寧元年卒三年王厚復湟鄯懷德至京師

拜感軍節度使封安化郡王

趙思忠卽瞎蕓之子木征也瞎蕓死木征不能自立青唐族酋瞎藥雞囉及僧鹿遵迎之居洮州欲立以復洮岷疊宕武勝軍諸羌秦州以其近邊逐之乃還河州後徙安江城董氊欲羈屬之不能有也母弟瞎吳叱別居銀川有聶家山至和初補本族副軍主嘉祐中河州刺史王韶經畧熙河遣僧智圓往說之啖以厚利因隨以兵前後殺其老弱數千焚族帳萬數得腹心酋領十餘人又禽其妻子皆不殺遂以熙寧七年四月舉洮河二州來降賜以姓名拜榮州團練使封其母郢成結遂寧

郡太夫人妻包氏咸寧郡君弟董谷賜名繼忠補六宅副使結吳延征賜名濟忠瞎吳叱曰紹忠巴氊角曰醇忠巴氊抹曰存忠長子邦辟勿丁旼曰懷義次蓋旼曰秉義皆超拜官以思忠爲秦州鈐轄不泄事而乞主熙河羌部經畧司以爲不可詔以二州給地五十頃後遷合州防禦使卒贈鎮洮軍節度觀察留後

宋史卷四百九十二

宋史卷四百九十三

元中書右丞相總裁脫脫等修

列傳第二百五十二

蠻夷一

西南溪峒諸蠻上

古者帝王之勤遠略耀兵四裔不過欲安內而捍外爾非所以求逞也西南諸蠻夷重山複嶺雜廁荆楚巴黔巫中四面皆王土乃欲揭上腴之征以取不毛之地疲易使之衆而得梗化之氓誠何益哉樹其酋長使自鎮撫始終蠻夷遇之斯計之得也然無經久之策以控馭

之狃麤之性便於跳梁或以讎隙相尋或以饑饉所逼
長嘯而起出則衝突州縣入則負固山林致煩興師討
捕雖能殄除而斯民之荼毒深矣宋恃文教而略武衛
亦豈先王制荒服之道哉西南溪峒諸蠻皆盤瓠種唐
虞爲要服周世其衆彌盛宣王命方叔伐之楚莊旣霸
遂服於楚秦昭使白起伐楚略取蠻夷置黔中郡漢改
爲武陵後漢建武中大爲寇鈔遣伏波將軍馬援等至
臨沅擊破之渠帥饑困乞降歷晉宋齊梁陳或叛或服
隋置辰州唐置錦州溪州巫州叙州皆其地也唐季之
亂蠻酋分據其地自署爲刺史晉天福中馬希範承襲

父業據有湖南時蠻徭保聚依山阻江殆十餘萬至周
行逢時數出寇邊逼辰永二州殺掠民畜無寧歲太祖
旣下荆湖思得通蠻情習險阨勇智可任者以鎮撫之
有辰州徭人秦再雄者長七尺武健多謀在行逢時屢
以戰鬪立功蠻黨伏之太祖召至闕下察其可用擢辰
州刺史官其子爲殿直賜予甚厚仍使自辟吏屬予一
州租賦再雄感恩誓死報効至州日訓練土兵得三千
人皆能被甲渡水歷山飛塹捷如猿猱又選親校二十
人分使諸蠻以傳朝廷懷來之意莫不從風而靡各得
降表以聞太祖大喜復召至闕面加獎激改辰州團練

使又以其門客王允成爲辰州推官再雄盡瘁邊圉五
州連袤數千里不增一兵不費帑庾終太祖世邊境無
患又有溪州刺史彭士愁等以溪錦獎州歸馬氏立銅
柱爲界建隆四年知溪州彭允林前溪州刺史田洪贊
等列狀歸順詔以允林爲溪州刺史洪贊爲萬州刺史
允林卒以其子師皎代爲刺史四月水鬪都虞候林抱
義上辰叙二州圖乾德二年四月溪叙獎等州民相攻
劫遣殿直牛允齋詔諭之乃定三年七月珍州刺史田
景千內附五溪團練使洽州刺史田處崇上言湖南節
度馬希範建叙州潭陽縣爲懿州署臣叔父萬盈爲刺

史希範卒其弟希萼襲位改爲洽州願復舊名詔從其請十二月詔溪州宜克五溪團練使刻印以賜之四年南州進銅鼓內附下溪州刺史田思遷亦以銅鼓虎皮麕臍來貢五年冬以溪州團練使彭允足爲濮州牢城都都指揮使溪州義軍都指揮使彭允賢爲衛州牢城都指揮使珍州錄事參軍田思曉爲博州牢城都指揮使允足等溪峒酋豪據山險持兩端故因其入朝而置之內地開寶元年珍州刺史田景遷言本州連歲災沴乞改爲高州從之八年景遷卒其子衙內都指揮使彥伊來請命卽以爲刺史九年獎州刺史田處達以丹砂石

英來貢太平興國二年懿州刺史五溪都團練使田漢瓊以其子弟女夫大將五溪統軍都指揮使田漢度而下十二人來貢詔竝加檢校官以獎之三年夷州蠻任朗政等來貢七年詔辰州不得移部內馬氏所鑄銅柱溪州刺史彭允殊上言刺史舊三年則爲州所易望朝廷禁止賜勅書安撫之八年錦溪叙富四州蠻相率詣辰州言願北內郡輸租稅詔長吏察其謠俗情僞并按視山川地形圖書來上卒不許懿州刺史田漢瓊錦州刺史田漢希上言願兩易其地詔從之又以知叙州舒德邦爲刺史雍熙元年黔南言溪峒夷獠疾病擊銅鼓

沙鑼以祀神鬼詔釋其銅禁淳化二年知晃州田漢權言本管砂井步夷人粟忠獲古晃州印一鈕來獻因請命以漢權爲晃州刺史又以五溪諸州統軍鶴州刺取向通漢爲富州刺史從其請也是年荆湖轉運使言富州向萬通殺皮師勝父子七人取五藏及首以祀魔鬼朝廷以其遠俗令勿問三年晃州刺史田漢權錦州刺史田保全遣使來貢五年以舒德郭言爲元州刺史獎晃叙懿元錦費福等州皆來貢上親視器幣以賜之至道元年高州溪州竝來貢二年上親祀南郊富州刺取向通漢上言聖人郊祀恩浹天壤況五溪諸州連接十

洞控西南夷戎之地惟臣州自昔至今爲辰州墻壁障
護辰州五邑王民安居臣雖僻處遐荒洗心事上伏望
陛下察臣勤王之誠因茲郊禮特加眞命詔加通漢檢
校司徒進封河內郡侯咸平元年通漢又言請定租賦
眞宗以荒服不征弗之許其年古州刺史向通展以芙
蓉朱砂二器馬十匹水銀千兩來獻詔有司鑄印以賜
通展二年以下溪州刺史彭允殊爲右千牛衛將軍致
仕以其姪文勇爲刺史三年高州刺史田彥伊遣子貢
方物及輸兵器四年其酋向君猛又遣弟君泰來朝上
溪州刺史彭文慶來貢水銀黃蠟五年正月天賜州蠻

向永豐等二十九人來朝夔州路轉運使丁謂言溪蠻入粟實緣邊砦柵頓息施萬諸州饋餉之弊臣觀自昔和戎安邊未有境外轉糧給我戍兵者先是蠻人數擾上召問巡檢使侯廷賞廷賞曰蠻無他求唯欲鹽爾上曰此常人所欲何不與之乃詔諭丁謂謂卽傳告陬落羣蠻感悅因相與盟約不爲寇鈔負約者衆殺之且曰天子濟我以食鹽我願輸與兵食自是邊穀有三年之積七月高州刺史田彥伊子承寶等百二十二人來朝賜巾服器幣以承寶爲山河使九溪十峒撫諭都監六年四月丁謂等言高州義軍務頭角田承進等擒生蠻

六百六十餘人奪所略漢口四百餘人初益州軍亂議者恐緣江下峽乃集施黔高溪蠻豪子弟捍禦羣蠻因熟漢路寇略而歸謂等至卽召與盟令還漢口旣而有生蠻違約謂遣承進率衆及發州兵擒獲之焚其室廬皆震懼伏罪謂乃置尖木砦施州界以控扼之自是寇鈔始息邊溪峒田民得耕種七月南高州義軍指揮使田彥強防虞指揮使田承海來貢施州叛蠻譚仲通等三十餘人來歸景德元年高州五姓義軍指揮使田文鄴來貢富州刺史向通漢遣使潭州營佛事以報朝廷存卹之惠二年夔州路降蠻首領皆自署職名請因而

命之上不許第令次補牙校是歲辰州諸蠻攻下溪州
爲其刺史彭儒猛擊走之擒酋首以獻詔賜儒猛錦袍
銀帶儒猛自陳母老願被恩典詔特加邑封十二月荆
湖北路言溪峒團練使彭文綰送還先陷漢口五十人
詔授文綰檢校太子賓客知中彭州其年懿州刺史田
漢希卒以其子漢能爲刺史三年高州新附蠻酋八十
九人來貢五溪都防禦使向通漢表求追贈父母從之
溪州刺史彭文慶率溪峒羣蠻來朝又高州諸名豪百
餘人入貢四年五月以高州刺史田彥伊子承寶爲寧
武郎將高州主軍都指揮使田思欽爲安化郎將其年

宜州軍亂朝廷恐宜融溪峒因緣侵擾因降詔約勒首領皆奉詔部分種族無敢輒動大中祥符元年夔州路言五圍蠻嘯聚謀劫高州欲令暗利砦援之上以蠻夷自相攻不許發兵三月知元州舒君強知吉州向光普竝加銀青光祿大夫檢校太子賓客八月黔州言磨嵯洛浦蠻首領龔行滿等率族二千三百人歸順十月溪峒諸蠻獻方物于泰山三年澧州言慈利縣蠻相讐劫知州劉仁霸請率兵定之上恐深入蠻境使其疑懼止令仁霸宣諭詔旨遂皆感服四年安遠順南永寧濁水州蠻酋田承曉等三百七十三人來貢五年詔昨許溪

峒蠻夷歸先劫漢口及五十人者特署職名仍聽來貢如聞緣此要利輒掠邊民充數所在切辨察之其年夔蠻千五百人乞朝貢上慮其勞費不許又詔施州溪蠻朔望犒以酒殺閏十月五溪蠻向貴升及磨嵯洛浦蠻來貢六年夔州蠻彭延暹龔才晃等來貢辰州溪峒都指揮使魏進武率山獠數百人數寇城砦朝廷不欲發兵窮討乃降詔招諭七年進武詣吏請罪署爲三班借職監房州稅仍賜裝錢八年詔中彭州彭文綰歲賜錦袍天禧元年溪州蠻寇擾遣兵討之二年辰州都巡檢使李守元率兵入白霧團擒蠻寇十五人斬首百級降

其酋二百餘人知辰州錢絳等入下溪州破砦柵斬蠻六十餘人降老幼千餘刺史彭儒猛亡入山林執其子仕漢等赴闕詔高州蠻捕儒猛來獻者厚加賞典其年儒猛因順州蠻田彥晏上狀本路自訴求歸轉運使以聞上哀憐之特許釋罪儒猛乃奉上所略民口器甲詔辰州通判劉中象召至明灘與歆血要盟遣之詔以仕漢爲殿直儒霸儒聰爲借職賜冠帶緡帛富州刺史向通漢率所部來朝貢名馬丹砂銀裝劔槊兜鍪彩牌等物詔賜襲衣金帶鞍勒馬并其子光澤以下器幣有差特許通漢五日一朝踰月通漢上五溪地理圖願留京

師上嘉美之特授通漢檢校太傅本州防禦使還賜疆土署其子光澤等三班職名通漢再表欲留京師不允乃爲光澤等求內地監臨及言歲賜衣願使者至本任竝從之旣辭又賜以襲衣金帶三年通漢卒以其子光憲知州事其後光澤不爲親族所容上表納土上察其意不許四年知古州向光普遣使鼎州營僧齋以祝聖壽初北江蠻酋最大者曰彭氏世有溪州州有三曰上中下溪又有龍賜天賜忠順保靜感化永順州六懿安遠新給富來寧南順高州十一總二十州皆置刺史而以下溪州刺史兼都誓主十九州皆隸焉謂之誓下州

將承襲都誓主率羣酋合議子孫若弟姪親黨之當立者具州名移辰州爲保證申鈐轄司以聞乃賜勅告印符受命者隔江北望拜謝州有押案副使及校吏聽自補置彭氏自允殊文勇儒猛相繼爲下溪州刺史至仕漢爲殿直留西京後輒遁歸天聖初以狀白辰州自言父老兄亡潛歸本道願放還家屬詔徙其家京師舍以官第未幾儒猛言仕漢逃歸誘羣蠻爲亂遣別子仕端等殺之朝廷嘉其忠降詔獎諭時儒猛爲檢校尚書右僕射特遷左僕射又以仕端爲檢校國子祭酒知涪州加賜鹽三百斤綵三十匹彭氏有文綰者知中彭州卽

忠順州也三年儒猛攻殺文縮其子儒索率其黨九十
二人來歸補儒索復州都知兵馬使餘官爲稟給五年
儒猛死仕端以名馬來獻詔還其馬命知下溪州賜以
袍帶七年遂以其弟仕義貢方物明道初仕端死復命
仕義爲刺史累遷檢校尚書右僕射自允殊至仕義五
世矣仕義有子師寶景祐中知忠順州慶歷四年以罪
絕其奉貢蓋自咸平以來始聽二十州納貢歲有常賜
蠻人以爲利有罪則絕之其後師寶數自訴請知上溪
州皇祐二年始從其請朝貢如故旣而師寶妻爲仕義
取去師寶忿恚至和二年與其子知龍賜州師黨舉族

稱號補官屬特遠人不知中國禮義而然守信等輕信
師寶之譖擅伐無辜願以二十州舊地復貢奉內屬朝
廷又遣殿中丞雷簡夫往視之嘉祐二年仕義乃歸所
掠兵丁五十一人械甲千八百九事率蠻衆七百飲血
就降辰州亦還其孥及銅柱時師寶已死遣師黨歸知
龍賜州戒勿殺自是仕義歲奉職貢然黠驚數盜邊卽
辰州界白馬崖下啞溪聚衆據守朝廷數招諭令歸侵
地不聽熙寧三年爲其子師綵所弑師綵專爲暴虐其
兄師晏攻殺之并誅其黨納誓表于朝并上仕義平生
鞍馬器服仍歸啞溪地乃命師晏襲州事五年復以馬

皮白峒地來獻詔進爲下溪州刺史賜母妻封邑章惇經制南北江湖北提點刑獄李平招納師晏誓下州峒蠻張景謂彭德儒向永勝覃文猛覃彥霸各以其地歸版籍師晏遂降詔脩築下溪州城并置砦於茶灘南岸賜新城名會溪新砦名黔安戍以兵隸辰州出租賦如漢民遣師晏詣闕授禮賓副使京東州都監官其下六十有四人元豐八年湖北轉運司言辰州江外生蠻覃仕穩等願內附詔不許招納其後彭仕誠者復爲都誓主元祐三年羅家蠻寇鈔詔召仕誠及都頭覃文懿等至辰州約束之是年知誓下保順州彭儒武知永順州

彭儒同知謂州彭思聰知龍賜州彭允宗知藍州彭士
明知吉州彭儒崇各同其州押案副使進奉與龍節及
冬至正旦溪布有差初熙寧中天子方用兵以威四夷
湖北提點刑獄趙鼎言峽州峒首刻剝亡度蠻衆願內
屬辰州布衣張翹亦上書言南北江利害遂以章惇察
訪湖北經制蠻事而南江之舒氏北江之彭氏梅山之
蘇氏誠州之楊氏相繼納土勅立城砦使之比內地爲
王民北江彭氏已見前南江諸蠻自辰州達于長沙邵
陽各有溪峒曰叙曰峽曰中勝曰元則舒氏居之曰獎
曰錦曰懿曰晃則田氏居之曰富曰鶴曰保順曰天賜

曰古則向氏居之舒氏則德邾德言君疆光銀田氏則
處達漢瓊漢希漢能漢權保金向氏則通漢光普行猛
永豐永晤皆受朝命自治平末光銀入貢故事南江諸
蠻亦隸辰州貢進則給以驛券光銀援以爲請詔以券
九道給之其後有峽州舒光秀者以刻剝其衆不附張
翹言南江諸蠻雖有十六州之地惟富峽叙僅有千戶
餘不滿百土廣無兵加以荐饑近向永晤與繡鶴叙諸
州蠻自相讐殺衆苦之咸思歸化願先招富峽二州俾
納土則餘州自歸井及彭師晏之孱弱皆可郡縣詔下
知辰州劉策商度策請如翹言熙寧五年乃遣章惇察

訪未幾策卒乃以東作坊使石鑑爲湖北鈐轄兼知辰州且助惇經制明年富州向晤獻先朝所賜劔及印來歸順繼而光銀光秀等亦降獨田氏有元猛者頗桀驁難制異時數侵奪舒向二族地惇遣左侍禁李資將輕兵往招諭資辰州流人曩與張翹同獻策者也福宥無謀褻慢夷獠遂爲懿洽州蠻所殺惇進兵破懿州南江州峒悉平遂置沅州以懿州新城爲治所尋又置誠州元祐初傅堯俞王巖叟言沅誠州勦建以來設官屯兵布列砦縣募役人調戍兵費鉅萬公私騷然荆湖兩路爲之空竭又自廣西融州勦開道路達誠州增置潯江

鑿堡其地無所有湖廣移賦以給一方民不安業願斟酌廢置朝廷以沅州建置至是十五年蠻情安習已久但廢誠州爲渠陽軍而沅州至今爲郡元祐初諸蠻復叛朝廷方務休息痛懲邀功生事廣西張整融州溫嵩坐擅殺蠻人皆寘之罪詔諭湖南北及廣西路曰國家疆理四海務在柔遠頃湖廣諸蠻近漢者無所統壹因其請吏量置城邑以撫治之邊臣邀功獻議剗通融州道路侵逼峒穴致生疑懼朝廷知其無用旋即廢罷邊吏失於撫遏遂爾扇搖其叛酋楊晟臺等竝免追討諸路所開道路剗置堡砦竝廢自後五溪郡縣棄而不問

崇寧以來開邊拓土之議復熾於是安化上三州及思
廣洞蒙光明樂安峒程大法都丹團黃光明靖州西道
楊再立辰州軍都管罵等各願納土輸貢賦又令廣西
招納左右江四百五十餘峒宣和中議者以爲招致熟
羌接武請吏竭金帛繒絮以啗其欲捐高爵厚奉以侈
其心開辟荒蕪草創城邑張皇事勢僥倖賞恩入版圖
者存虛名克府庫者亡實利不毛之地旣不可耕狼子
野心頑冥莫革建築之後西南夷獠交寇而溪峒子蠻
亦復跳梁士卒死於干戈官吏沒於王事肝腦塗地徃
往有之以此知納土之議非徒無益而又害之所由生

也莫若俾帥臣監司條具建築以來財用出入之數商較利病可省者省可併者併減戍兵漕運而夷狄可撫邊鄙可亡患矣乃詔悉廢所置初郡其餘諸蠻自乾興以來或叛或服其類不一各以歲月次之乾興初順州蠻田彥晏率其黨田承恩寇施州暗利砦縱火而去夔州發兵擊之俘獲甚衆彥晏在真宗朝爲歸德將軍檢校太子賓客知順州承恩者知保順州田彥曉子也明年彥晏歛邊上誓狀願還所掠金帛器械且輸粟二千石自贖詔拒其粟舍其所負金帛第令歸掠去戶口仍加彥晏寧遠將軍檢校工部尚書承恩檢校國子祭酒

兼監察御史皆知州如故後又有田忠顯者與其黨百九人入貢天聖二年知古州向光普自言嘗勸佛寺請名報國歲度僧一人許之四年歸順等州蠻田思欽等以方物來獻時來者三百一人而夔州路轉運使不先以聞詔劾之既而又詔安遠天賜保順南順等州蠻貢京師道里遼遠而離寒暑之苦其聽以貢物留施州所賜就給之願入貢者十人聽三二人至闕下首領聽三年一至七年黔州蠻舒延蠻繡州蠻向光緒皆來貢九年施州屬蠻覃彥綰等寇永寧砦景祐中澧州屬蠻五百餘人入寇時州將崔承祐畏避不以聞爲荆湖鈐轄

司所奏詔劾罷之寶元二年辰州狝獠三千餘人欵附以州將張昭懿招輯有功進一官慶歷三年桂陽監蠻獠內寇詔發兵捕擊之蠻獠者居山谷間其山自衡州常寧縣屬于桂陽郴連賀韶四州環紆千餘里蠻居其中不事賦役謂之獠人初有吉州巫黃捉鬼與其兄弟數人皆習蠻法往來常寧出入溪峒誘蠻衆數百人盜販鹽殺官軍迓匿峒中旣招出而殺之又徙山下民他處至是其黨遂合五千人出桂陽藍山縣華陰峒害巡檢李延祚潭州都監張克明事聞擢楊畋提點刑獄督清理事久之不克遂詔湖南轉運使郭輔之等招撫之

始於湖南置安撫司蠻所至殺掠居民縱火劫財物被害者甚衆詔被害者并入山捕蠻土兵蠲復有差初發兵捕蠻至或誤殺良民仁宗命訪之口給絹五匹仍拊其家時蠻勢方熾又遣殿中侍御史王絲三司度支副使徐的經制降勅書委知潭州劉沆招諭能自歸者第錄以官沆大發兵臨之以勅書從事降二千餘人使散居所部錄其首領鄧文志黃文晟黃士元皆爲三班奉職又以內殿承制开贊崇班胡元嘗在石碓峒捕殺有勞進贊莊宅副使元禮賓副使時四年冬也五年二月餘黨唐和等復內寇乃詔湖南安撫轉運提點刑獄便

宜從事又特賜官兵土丁錢有差於是沆檄楊畋等八
路入討覆蕩桃油平能家源等皆其巢穴捕斬首級甚
衆詔官兵有功者九百餘人第遷一資錄其應募討擊
者道州進士十四人竝官之然唐和等猶未平又詔如
聞賊黨欲降其罷出兵逃匿者諭使歸復州縣拊存之
是冬蠻復入寇與胡元及右侍禁郭正趙鼎殿侍王孝
先戰于華陰峒隘口元等死之劉沆楊畋皆坐黜以劉
夔代沆爲安撫使夔言唐和等旣敗官軍殺將吏聚衆
益自疑恐寢爲邊患願以詔書招安就補溪峒首領詔
可是時湖湘騷動兵不得息六年夏仁宗顧謂輔臣曰

官軍久戍南方夏秋之交瘴癘爲虐其令太醫定方和藥遣使給之自是繼賜緡錢未幾夔言敗唐和於銀江源轉運使周沆亦言指揮辛景賢招降賊黨五十六戶二百五十九人錄其首領戒所部拊存之先是命三司戶部判官崔嶧爲體量安撫往議討除招安二策旣而知桂陽監宋守信奏唐和嘯聚千餘衆爲盜五六年卒未能克者朝廷不許窮討故也今衡州監酒黃士元頗習溪峒事願得敢戰士二千引路土丁二百優給金帛使之逐捕必得然後已并勅开贊等合力以進彼旣勢窮必將歛附詔用其策於是大發兵討之其衆果懼遁

入郴州黃莽山由趙峒轉寇英韶州依山自保是冬帝
閱士卒暴露復諭執政密戒主帥安恤七年唐和遣其
子執要領詣官自言願貸糧米居所保峒中時楊畋復
爲湖南鈐轄詔趨連韶州山下與廣南東西轉運使共
告諭之使以兵械上官質其親屬詔補唐和盤知諒房
承映承泰文運等五人爲峒主授銀青光祿大夫檢校
國子祭酒兼監察御史武騎尉知諒等蓋唐和黨也至
冬其衆悉降皇祐五年邵州蠻舒光銀因湖南安撫司
自陳捍禦之勞願於峒中置中勝州詔可嘉祐二年羅
城峒蠻寇澧州發兵擊走之三年以施州蠻向承勝所

領州爲安定州五年以邵州蠻楊光倩知徽州光倩通漢之子也通漢慶歷初嘗入貢旣死光倩襲之舊制溪峒知州卒承襲者許進奉行州事撫遏蠻人及五年安撫司爲奏給敕告至是光倩行州事七年無他過故命之

宋史卷四百九十三

宋史卷四百九十四

元中書右丞相總裁脫脫等修

列傳第二百五十三

蠻夷二

西南溪峒諸蠻下

梅山峒

誠徽州

南丹州

紹興三年臣僚言武岡軍溪峒舊嘗集人戶爲義保蓋其風土習俗服食器械悉同獠人故可爲疆場捍蔽雖曰籍之於官然亦未嘗遠戍靖康間調之以勤王其後湖南盜起征歛百出義保無復舊制困苦不勝乃舉其

世業客依蠻峒聽其縣役州縣猶驗舊籍催科胥隸及門則挈家遠徙官失其稅蠻獠日強兼武岡所屬三縣悉爲獠人所有遠戍之實已無而鄉戶弩手之名尚在歲取其直人戶咨怨乞擇本路監司詳議以聞詔從之四年辰州言歸明保靜南渭永順三州彭儒武等久欲奉表入貢詔以道路未通俾荆湖北帥司慰諭免赴闕遣人持表及方物赴行在仍優賜以答之九月詔荆湖南北路溪峒頭首土人及主管年滿人合給恩賜俾各路帥司會計覆實以聞六年知鼎州張覺言鼎澧辰沅靖州與溪峒接壤祖宗時嘗置弓弩手得其死力比緣

多故遂皆廢闕萬一蠻夷生變將誰與捍禦今雖各出
良田募人以補其額率皆豪強遣僮奴竄名籍中乘時
射利無益公家所宜汰去則募溪峒司兵得三百人俾
加習練足爲守禦給田募人開墾以供軍儲詔荆湖北
路帥司相度以聞帥司言營田四州舊置弓弩手九千
一百一十人練習武事散居邊境鎮撫蠻夷平居則事
耕作緩急以備戰守深爲利便靖康初調發應援河東
全軍陷沒今辰沅澧靖等州乏兵防守竊慮蠻夷生變
叵測若將四州弓弩手減元額定爲三千五百人辰州
置千人沅州置千五百人澧州靖州各置五百人分處

要害量給土田訓練以時耕戰合度庶可備禦以所餘
閑田募人耕作歲收其租其於邊防財賦兩得其便可
爲經久之計詔從之七年六月張翬言湖外自靖康以
來盜賊盤踞鍾相楊太山雷德進等相繼叛澧州所屬
尤甚獨慈利縣向思勝等五人素號溪峒歸明誓掌防
拓卒能保境息民使德進賊黨無所剽掠思勝後竟殺
德進會官軍招撫劉智等而彭永健彭永政彭永全彭
永勝及思勝共獻糧助官軍招復諸山四十餘柵宣力
効忠功居多宜加恩賞詔思勝等五人各轉兩資九月
詔荆湖廣南路溪峒頭首土人內有子孫應襲職名差

遣及主管年滿合給恩賜之數俾帥司取會覈實以聞
九年宜章峒民駱科作亂寇郴道連桂陽諸州縣詔發
大兵往討之獲駱科餘黨歐幼四等復叛據藍山寇平
陽縣遣江西兵馬都監程師回討平之十年承信郎琴
州溪峒楊進顥等率族屬歸生界五百餘戶疆土三百
餘里獻累世所造兵器及金爐酒楮各一求入覲詔本
路帥司敦遣以行十二年詔以施州南砦路夷人向再
健襲父思遷克銀青光祿大夫檢校國子祭酒兼監察
御史武騎尉知懿州事十四年十月湖南安撫使劉昉
奏武岡軍獠人有父子相殺者宜出兵助其父俾還省

地上以問輔臣秦檜檜曰恐輕舉生事帝曰恩威不可偏廢可懷則示之以恩否則威之不侵省地則已或有所侵柰何不舉俾知所畏哉十二月成忠郎充武岡軍綏寧縣管界都巡檢兼溪峒首領楊進京率其族三百人備黃金朱砂方物求入貢先遣其子孝友陳請詔本路帥司閱舊制以聞給孝友錢三百貫俾還聽進止十五年楊進顯復求入貢以武岡軍不時敦遣爲言詔本路帥司閱實應襲人姓名來上併促進顯入覲四月廣南東路提刑黃應南言溪峒巡檢尉砦官不嚴守備縱民與猺交通恐啓邊釁乞詔有司申嚴法令俾帥臣監

司常加覺察幸臣以爲沿邊互市恐不宜禁絕帝曰往年禁西夏互市遂至用兵可令帥司裁決前知全州高楫言獠人今皆微弱不敢先侵省地若官每縱人深入畧其財物遂致乘間竊發宜詔與溪峒接壤州郡毋侵獠人庶使邊民安業以廣陛下柔遠好生之德帝從其言詔守臣一遵成法務在撫綏二十四年禽楊正修及其弟正拱送理寺獄鞫治斬之初正修侍其父再興入覲獻還省民疆土遂命以官建炎後與弟正拱率九十團峒獠人出武岡軍縱火殺掠民財爲亂紹興間潭州帥司嘗招徠之後復作亂屢抗官軍至是伏誅二十八

年七月楊進京等復求入貢詔以道遠慰諭之優其賜與隆興初右正言尹穡言湖南州縣多隣溪峒省民往往交通徭人擅自易田豪猾大姓或許匿其產徭人以避科差內虧國賦外滋邊患宜詔湖南安撫司表正經界禁民毋質田徭人詐匿其產徭人者論如法仍沒入其田以賞告姦者田前賣入徭人俾爲別籍毋遽奪能還其田者縣代給錢償之帝從其言乾道元年宜章峒賊李金陷郴州焚桂楊軍州將棄城遁衡州調常寧縣兵救之弗克世忠峒李昂霄者率壯丁禦賊民恃以安湖南提舉常平鄭丙請發鄂渚軍討賊平之昂霄以功

補承節郎管轄衡州常寧縣溪峒及官其子當年俾後
得襲職三年靖州界瑤人姚明教等作亂詔荆鄂駐劄
明椿選將率精銳千人會屯戍官合擊之能立功者有
厚賞八月詔平溪峒互市鹽米價聽民便毋相抑配其
瑤人歲輸身丁米務平收無取羨餘及折輸錢違者論
罪十一月南郊禮成詔以緣邊溪峒州縣失於拊循致
懷反側或逃竄山谷其在赦恩以前並加寬宥能復業
者罪一切置不問互市如故悉聽其便守臣常加撫問
以稱綏遠之意四年二月詔湖南北四川二廣州軍應
有溪峒處務先恩信綏懷毋弛防閑毋襲科擾毋貪功

而啓釁委各路帥臣監司常加覺察是月詔禁沿邊姦人毋越逸溪峒誘致蠻獠侵內地違者論如律其不能防閑致越逸者亦罪之湖廣總領周嗣武言邊事如二年四月之詔帝嘉納之是歲田彥古死子忠佐襲職授銀青光祿大夫檢校散騎常侍知溪峒安化州兼監察御史飛龍騎尉六年盧陽西據獠楊添朝寇邊知沅州孫叔傑調兵數千討之敗績死者十七八初獠人與省戶交爭殺二人死叔傑輒出兵破其十三柵奪還所侵地於是獠人相結爲亂諸司請調常德府城兵三百人益官兵三千人合擊討之宰臣虞允文奏曰蠻夷爲變

皆守臣貪功所致今猺人仇視守臣若更去叔傑量遣
官軍示以兵威徐與盟誓自可平定帝允其奏俾葉行
代叔傑開示恩信諭以禍福遂招降之邊境悉平前知
武岡軍趙善穀言武岡與湖北廣西隣壤爲極邊之地
溪峒七百八十餘所七峒隸綏寧縣五溪峒隸臨江縣
紹興三十年減冗員改縣爲臨口砦然五峒之猺俗尤
獷悍鬻生毫髮則操戈相讐砦官不能爲輕重況本軍
巡防砦柵惟真良三門兵溪香平有土軍可備守禦餘
有官無兵其闕缺武陽等砦設巡檢二員徒費廩祿以
臣所知宜復臨口砦爲縣則猺蠻易於制服汰去冗員

則官廩亦無虛費實邊郡之利也七年前知辰州章才邵上言辰之諸蠻與羈縻保靜南謂永順三州接壤其蠻酋歲貢溪布利於回賜頗覺馴伏盧溪諸蠻以靖康多故縣無守禦狁狁乘隙焚劫後徙縣治於沅陵縣之江口蠻酋田仕羅龔志能等遂雄據其地沅陵之浦口地平衍膏腴多水田頃爲猺蠻侵掠民皆轉徙而田野荒穢會守猝無遠慮乃以其田給靖州狁狁楊姓者俾佃作而課其租所獲甚微楊氏專其地將二十年其地當沅靖二州水陸之衝一有蠻隙則爲害不細臣謂宜預爲之備靖康前辰州每歲蒙朝廷賜錢七萬貫紬絹

布共八千一百匹綿一萬七千兩是時本州廂禁軍一千四百餘人沿邊一十六砦土兵六百餘人皆可贍給其後中外多故今歲賜止得一萬二千緡而本州財復匱乏無以充召募之費禁軍止二百一十餘人諸砦土兵止一百五人甚至砦官有全無一兵而徒存虛名者其於邊防豈可不爲深慮若歲增給民錢一萬俾本州募強壯禁軍或効用二百人分屯盧溪等處以防諸蠻庶使邊患永消可免異時調遣之費書奏詔湖北帥臣詳議以聞是年申嚴邊民售田之禁守令不能奉法者除名部刺史常加糾察八年知貴州陳又上疏言臣前

知靖州時居蠻夷腹心民不服役田不輸賦其地似若可棄然爲重湖二廣保障實南服之要區也或控制失宜或金穀不繼或兵甲少振蠻獠則乘時竊發勤勞王師朝廷當重守臣之選崇寧初戍兵三千人建炎以來每於都統司或帥司摘兵二千人以備屯戍其凶悍者以州郡不能制遂慢守臣反通獠蠻以撓編民州郡非白主帥不敢治比得報已晚矣故戍兵敢肆其惡一旦有警復安能爲用臣以爲宜聽守臣節制爲便帝嘉其言復問左右曰靖隸湖北今聞仰給廣西何也趙雄對曰靖州本溪峒神宗時朔爲誠州元祐間廢尋復爲軍

徽宗朝始改靖州與桂府爲鄰故令廣西給其金穀之費近歲漕司匱乏乃責辦諸州以故不能如約宜復舊制俾廣西漕臣如期饋運靖州屯戍官兵聽守臣節制於事爲便帝從之十年四月全州上言本州密邇溪峒邊民本非姦惡其始朝廷禁法非不嚴密監司州郡非不奉行特以平居失於防閑故馴致其亂又兼溪谷山徑非止一途如靜江興安之大通虛武岡軍之新寧益溪及八十里山永州之東安皆可以徑達溪峒其地綿亘郡邑非一州得專約束故遊民惡少之棄本者商旅之避征稅者盜賊之亡命者往往由之以入萃爲淵藪

交相鼓扇深爲邊患如武岡楊再興桂陽陳峒相繼爲亂實原於此爲今計者宜徙閑地巡檢兵及分遣士卒屯諸溪谷山徑間俾湖南北廣西帥憲總其役庶幾事權有歸號令可行也儒林郎李大性上言比年猺蠻爲亂邊吏慮妨賞格往往匿不以聞遂致猖獗使一方民命寄於猺人之手誠可哀憫近如梁牟等寇沅州劫墟市殺戮齊民州縣告急於兩月之後比調官軍討捕俘降其賊而人之被害已酷矣宜戒州縣或遇猺人竊發晝時以聞違者論罪仍命監司帥臣常加覺察庶幾先事備禦俾猺人亦知畏懼不敢侵軼以傷吾民也十一

年詔給事中中書舍人戶部長貳同勅令所議禁民毋質徭人田以奪其業俾能自養以息邊釁從知沅州王鎮之請也沅州生界狁狁副峒官吳自由子三人貨丹砂麻陽縣巡檢唐人傑誣爲盜執之送獄自由率峒官楊友祿等謀爲亂帥司調神勁軍三百人及沅州民兵屯境上聲言進討先遣歸明官田思忠往招撫之以孔目官爲質世祿等旣盟自由取其三子以歸嘉泰三年前知潭州湖南安撫趙彥勵上言湖南九郡皆接溪峒蠻夷叛服不常深爲邊患制馭之方豈無其說臣以爲宜擇素有知勇爲徭人所信服者立爲酋長借補小官

以鎮撫之況其習俗嗜欲悉同瑤人利害情僞莫不習知故可坐而制服之也五年之間能立勞効卽與補正彼旣榮顯其身取重鄉曲豈不自愛盡忠公家哉所謂捐虛名而收實利安邊之上策也帝下其議旣而諸司復上言往時溪峒設首領峒主頭角官及防邊指揮等使皆其長也比年往往行賄得之爲害滋甚今宜一新蠻夷耳目如趙彥勵之請所謂以蠻夷治蠻夷策之上也帝從之嘉定元年郴州黑風峒瑤人羅世傳寇邊飛虎統制邊寧戰沒江西湖南驚擾知隆興趙希擇知潭州史彌堅共招降之二年李元礪羅孟二寇江西攻破

龍泉縣李再興戰敗死之江州駐劄都統制趙選亦戰死初吉州獲賊長七人繫獄土豪黃從龍爲賊畫策賂吉守李綱得縱還賊遂無所忌有侯押隊者領兵戍龍泉境上元礪復用從龍計椎牛釃酒以犒官軍賊至官軍皆醉狼狽散走寇之初起甚微賊伺知議論不一故玩侮官軍方江西力戰則求降湖南湖南戰則求降江西牽制王師使不得相應援其後命工部侍郎王居安知豫章擒獲之溪峒畧平五年臣僚上言辰沅靖等州舊嘗募民爲弓弩手給地以耕俾爲世業邊陲獲保障之安州縣無轉輸之費比年多故其制浸弛搖蠻因之

爲亂沿邊諸郡悉受其害比申朝廷調兵招捕曠日持
久蠻夷習玩成其猖獗之勢其如楊晟臺李全姚明教
羅孟二李元礪陳廷佐之徒皆近事之明驗也爲今計
者宜講舊制可紓饋餉之勞而得備禦之實其安邊息
民之長策歟七年臣僚復上言辰沅靖三州之地多接
溪峒其居內地者謂之省民熟戶山獠峒丁乃居外爲
捍蔽其初匿處詳密立法行事悉有定制峒丁等皆計
口給田多寡闊狹疆畔井井擅鬻者有禁私易者有罰
一夫歲輸租三斗無他繇役故皆樂爲之用邊陲有警
衆庶雲集爭負弩矢前驅出萬死不顧比年防禁日弛

山獠峒丁得私售田田之歸於民者常賦復外輸稅公家因資之以爲利故謾不加省而山獠峒丁之常租仍虛掛版籍責其償益急往往不能聊生反寄命獠人或導其入寇爲害滋甚宜勅湖廣監司檄諸郡俾循舊制毋廢庶邊境綏靖而遠人獲安也

梅山峒蠻舊不與中國通其地東接潭南接邵其西則辰其北則鼎澧而梅山居其中開寶八年嘗寇邵之武岡潭之長沙太平興國二年左甲首領苞漢陽右甲首領頓漢凌寇掠邊界朝廷累遣使招諭不聽命客省使翟守素調潭州兵討平之自是禁不得與漢民交通其

地不得耕牧後有蘇方者居之數侵奪舒向二族嘉祐末知益陽縣張頡收捕其桀黠符三等遂經營開拓安撫使吳中復以聞其議中格湖南轉運副使范子奇復奏蠻恃險爲邊患宜臣屬而郡縣之子奇尋召還又述前議熙寧五年乃詔知潭州潘夙湖南轉運副使蔡燦判官喬執中同經制章惇招納之惇遣執中知全州將行而大田三砦蠻犯境又飛山之蠻近在全州之西執中至全州大田諸蠻納欵於是遂檄諭開梅山蠻獠爭開道路以待得其地東起寧鄉縣司徒嶺西抵邵陽白沙砦北界益陽四里河南止湘鄉佛子嶺籍其民得主

客萬四千八百九戶萬九千八十九丁田二十六萬四百三十六畝均定其稅使歲一輸乃築武陽開峽二城詔以山地置新化縣并二城隸邵州自是鼎澧可以南至邵

誠徽州唐溪峒州宋初楊氏居之號十峒首領以其族姓散掌州峒太平興國四年首領楊蘊始來內附五年楊通寶始入貢命爲誠州刺史淳化二年其刺史楊政巖復來貢是歲政巖卒以其子通塏繼知州事熙寧八年有楊光富者率其族姓二十三州峒歸附詔以光富爲右班殿直昌運五人補三班奉職晟情等十六人補

三司將軍繼有楊昌銜者亦願罷進奉出租賦爲漢民
詔補爲右班殿直子弟姪十八人補授有差獨光僭頗
負固不從命詔湖南轉運使朱初平羈縻之未幾亦降
乃與其子曰儼請於其側建學舍求名士教子孫詔潭
州長史朴成爲徽誠等州教授光僭皇城使誠州刺史
致仕官爲建宅置飛山一帶道路巡檢光僭未及拜而
卒遂以贈之錄其子六人元豐三年知邵州關杞請於
徽誠則融嶺擇要害地築城砦以絕邊患詔湖南安撫
謝景溫轉運使朱初平判官趙揚商度以聞景溫等以
爲宜如杞言乃議誠州以沅州貫保砦爲渠陽縣隸之

以徽州爲蒔竹縣隸邵州趙揚言上江多星銅鼓羊鎮
潭溪上和上城天村大田等團竝至誠州城下貿易可
漸招撫併乞下湖南邵州蒔竹縣招諭芙蓉萬驛諸團
從之徙誠州治渠陽而貫保爲砦如故上江等諸團果
皆納土於是增築多星等砦還連徽廣西融州王口砦
焉元祐二年改誠州爲渠陽軍罷兩州兵馬及守禦民
丁有楊晟臺者乘閒寇文村堡知渠陽軍胡田措置亡
術蠻結西融州蠻砦粟仁催往來兩路爲民患調兵屯
渠陽至萬人湖南亦增屯兵應援三路俱驚朝廷方務
省事議廢堡砦徹戍守而以其地予蠻乃詔湖北轉運

副使李茂直招撫又遣唐义同措置邊事討之後以渠陽爲誠州命光僭之子供備庫使昌達供備庫副使楊昌等同知州事而貫保豐山若水等砦皆罷戍擇授土官俾又間毀樓櫓撤官舍護領居民入砦崇寧初改誠州爲靖州

南丹州蠻亦溪峒之別種也地與宜州及西南夷接壤開寶七年酋帥莫洪蕃遣使陳紹規奉表求內附九年復來貢求賜牌印詔刻印以給之太平興國五年洪蕃貢銀百兩以賀太平雍熙四年洪蕃族人知寶隆鎮莫淮聞牛一頭逐水草至金城州河池縣宜州牙校周承

鑿以其牛耕作淮閩三遣人取牛承鑿不還凡耕十日始釋牛逐水草去淮閩怒領鄉兵六十人劫取承鑿家資財驅縣民莫世家牛六頭以歸誘羣蠻爲寇上遣供奉官王承緒乘傳劾承鑿具伏占牛詔棄市時知宜州贊善大夫侯汀失於備禦羣蠻之擾頗害及民庶詔發諸州兵進討兵未至悉已遁歸汀坐免官詔諭宜融柳州百姓及蠻界人戶曰朕託兆庶之上處司牧之重照臨所暨撫養是均矧於遐陬尤所軫慮昨以知宜州事侯汀失於綏緝恣其侵牟致茲邊夷起爲寇鈔侵騷閩里虔劉士庶及興師而討伐乃畏威而竄伏朕以興戎

召釁職由於汀爰舉國章削其官秩汝等所宜體予含垢革乃前非安土厚生保境延世嬉我至化是爲永圖或尚恣於陸梁當盡勦其族類自是不復爲寇淳化元年洪誓卒其弟洪皓襲稱刺史遣其子淮通來貢銀盃二十銅鼓三面銅印一鈕旗一帖繡真珠紅羅襦一上降優詔賜綵百匹還其襦自洪誓領州十餘年歲輸白金百兩洪皓之襲兄位專其地利不脩常貢其弟洪沅忿之挈妻子來奔宜州洪皓怒其背已數引兵攻洪沅洪沅與二男并牙將一人乘傳詣闕訴其事請發兵致討上以蠻夷之俗羈縻而已不欲爲之興師報怨洪沅

先自稱南丹州副使以爲邵州團練使給田十頃下詔
戒勅洪皓景德二年洪皓死長子淮勅襲父任俄爲弟
淮迪攻南丹州淮勅帥屬來奔詔宜州賜閑田資給之
大中祥符五年宜州言淮迪頗集諸蠻阻富仁監道路
上廉知淮迪無侵擾狀遣使犒設撫勞之九年撫水蠻
叛詔淮迪約勒溪峒勿從誘脅明年平撫水蠻淮迪等
竝以勞進秩景祐三年有淮戟者舉族來歸命爲湖南
州團練副使勅州縣拊存後淮迪老自言願傳其子世
漸至和元年命世漸爲檢校散騎常侍權發遣州事明
年以淮迪爲懷遠大將軍致仕世漸爲刺史檢校工部

尚書賜袍帶錢十萬絹百匹又補其親黨數十人爲檢校官如故事也世漸死嘉祐末命其子公帳襲之有世忍者亦淮迪之子也初率其屬人內附治平初迺歸攻殺公帳奪其地自首請於朝廷願授刺史補其親黨如故事歲輸銀百兩三年遂命爲刺史皆如其請熙寧二年猺賊殺人世忍執以獻授檢校禮部尚書元豐三年入貢其印以西南諸道武盛軍德政官家明天國主爲文詔以南丹州印賜之令毀其舊印六年大軍討安化世忍獻弓矢自言願世世爲外臣脩貢不懈遷檢校戶部尚書給銅牌旗號官其子姪九人世忍死子公佞襲

大觀元年廣西經略使王祖道言公佞就擒進築平允
從州牧文地蘭那安外習南丹八州之地併爲鎮庭孚
觀州延德軍以其弟公晟襲刺史宣和四年公晟乞以
州事付其姪延豐願與其子歸朝詔從之仍乘驛給券
紹興三年公晟攻圍觀州焚寶積監朱勝非奏崇觀宣
和間所開新邊比來往往棄而不守帥臣監司屢言觀
州爲控扼之地不宜棄帝曰前日用事之臣貪功生事
公爲欺罔其實勞民費財使遠俗不安也又用廣南經
略安撫使劉彥適言以公晟知南丹州兼溪峒都巡檢
使提舉盜賊公事給以南丹州刺史舊印公晟未受命

二十四年公晟始貢馬率諸蠻來歸帝諭輔臣曰得南丹非爲廣地也但徭人不叛百姓安業爲可喜耳遂以延沈襲公晟職授銀青光祿大夫檢校太子賓客使持節南丹州諸軍事南丹州刺史兼御史大夫知南丹州公事武騎尉廣西經略安撫使呂愿中請降諸蠻三十一種得州二十七縣一百三十五砦四十峒一百七十九及一鎮三十二團皆爲羈縻州縣二十五年延沈進補團練防禦二使三十二年延沈恣行慘酷爲諸蠻所逐歸死省地衆推延稟襲職隆興二年延廩復爲諸蠻所圖攜家歸朝經略司奏以延甚襲職淳熙元年南丹

爲永樂州所攻使來告急廣西帥臣遣將領陳泰權天河縣主簿徐彌高諭和之十四年經略司奏以延廕襲職詔從其請嘉泰五年延廕之子光熙襲職知南丹州事

宋史卷四百九十四

宋史卷四百九十五

元中書右丞相總裁脫脫等修

列傳第二百五十四

蠻夷三

撫水州

廣源州

黎洞

環州

撫水州在宜州南有縣四曰撫水曰京水曰多逢曰古勞唐隸黔南其酋皆蒙姓同出有上中下三房及北遐一鎮民則有區廖潘吳四姓亦種水田採魚其保聚山險者雖有畚田收穀粟甚少但以藥箭射生取鳥獸盡卽徙他處無羊馬桑柘地曰帚洞五十里至前村川原

稍平合五百餘家夾龍江居種稻似湖湘中有樓屋戰
棚衛以竹柵卽其會所居兵器有環刀標牌木弩善爲
箭中者大叫信宿死得邕州藥解之卽活雍熙中數寇
邊境掠取民口畜產詔書招安補其會蒙令地殿直蒙
令札奉職咸平中又數爲寇盜止令邊臣驅逐出境其
黨狡獪者凡三十餘人宜州守將因擒送闕下上詔見
詰責之對曰臣等蠻陬小民爲饑寒所迫耳上顧謂左
右曰昨不欲盡令殺戮顧無噍類矣因釋罪賜錦袍帶
冠銀絲戒勗遣之逾年會長蒙頂等六十五人詣闕納
器甲百七十事又蒙漢誠蒙虔瑋蒙填來朝上器甲數

百及毒藥箭誓不搔邊比歲皆遣使來貢及輸兵器乃授漢誠官賜物有差既而侵軼如故景德三年蠻酋蒙填詣宜州自陳願朝貢謝罪詔守臣諭以盡還所掠民貲畜乃從其請大中祥符六年首領指揮使蒙但挈族來歸徙於桂州九年數寇宜融州界轉運使俞獻可言知宜州董元已不善綏撫昨蠻人饑來質餼糧公縱主者剋剝槩量及求入貢復驟沮其意遂使忿恚爲亂詔出元已遂遣潭州都監季守睿代元已招撫羣蠻拒命侵掠不已獻可請以本道澄海軍及募丁壯進討乃詔益以潭州兵五千人命東染院使平州刺史曹克明爲

導開路進師蠻依篁竹間時出戰鬪輒敗走旬餘上黃
泥嶺杉木隘路溪谷險邃蠻據要害以拒官軍自辰至
午大潰其黨遂過霸死抵帝洞乃入中房前村克明等
頓兵下砦中夕羣蠻大譁譟擊鉦鼓攻砦甚急出兵擊
之傷殺頗衆因縱火焚其廬室積聚自此恐懼竄入山
谷又緣龍江南岸而東至昏暮過石峽隘險士不並行
蠻復連弩北岸克明遣猛士步涉與鬪至卽退走砦于
下房博賀村克明設伏砦外其夜蠻衆大集遇伏發內
外合擊追斬殆盡乘勝搜山悉得馬牛享士卒克明等
知其窮蹙乃曉諭恩信許以改過於是酋帥蒙承貴等

面縛詣軍自首克明厚加犒宴且數責之皆俯伏謝罪及聞詔旨赦令勿殺莫不泣下北望稱萬歲上以夷性無厭習知朝廷多釋其罪故急則來歸緩則叛去切詔克明等論以悉還所掠漢口資畜卽許要盟承貴等感悅奉詔乃歃猫血立誓自言奴山摧倒龍江西流不敢復叛克明等師還宜州蠻人納器甲凡五千數願遷處漢地者七百餘口詔分置廣西及荆湖州軍給以田糧凡立功使臣將士遷補賜賚者千八百一十六人承貴因請改州縣名以固歸順之意詔以撫水州爲安化州撫水縣爲歸仁縣京水縣爲長寧縣自是間歲朝貢不

復爲邊患矣獻可等又言殿直蒙肚知歸化州州與撫
水相接數遣子文寶及其妻族甘堂偵軍事又其子格
與官軍鬪敵悉部送赴闕有蒙隻者亦肚之子先嘗告
賊署爲昭州押牙詔補肚密州別駕隻海州都押牙賦
以官田文寶格甘堂並黥配登萊州寶元元年復率衆
寇融宜州發邵澧潭三州戍兵合數千人往擊時蠻勢
方熾至殺運糧官吏復詔趣兵進討踰年乃平慶歷中
再以方物入貢至和二年復至詔以知州蒙全會爲三
班奉職又以監州姚全料爲借職嘉祐六年又來貢是
後月赴宜州參謁及賀巨報每歲州四管犒及三歲聽

翰所貢兵械於思立砦以其直償之遞以官資遷補熙
寧初知宜州錢師孟通判曹覲擅裁損侵剝之士人羅
世念蒙承想蒙光仲等爲亂五年攻德謹砦襲將官費
萬殺之經畧司問致寇狀而宜州但以飢爲言故朝廷
賜粟二萬石以安輯之已而守臣王奇戰死事聞乃詔
知沅州謝麟帶御器械和斌經制溪洞發在京驍騎兩
營及江南福建將兵三千五百人以聽師期明年世念
等遂與諸蠻峒首領族類四千五百人出降以世念爲
內殿承制承想光仲等十人各拜官崇寧二年其酋蒙
光有者復嘯聚爲寇經畧司遣將官黃忱等擊卻之大

觀二年遂以三州一鎮戶口六萬一千來上詔以知融
州程鄰往黔南路撫諭官吏推恩有差至和後又有融
州屬蠻大邱峒首領楊光朝請內附又有楊克端等百
三人來歸皆納之諸蠻族類不一大抵依阻山谷並林
木爲居椎髻跣足走險如履平地言語侏離衣服編爛
畏鬼神喜淫祀刻木爲契不能相君長以財力雄彊每
忿怒則推刃同氣加兵父子間復讎怨不顧死出入腰
弓矢匿草中射人得牛酒則釋然矣親戚比隣指授相
賣父子別業父貧則質身於子去禽獸無幾其族鑄銅
爲大鼓初成懸庭中置酒以召同類爭以金銀爲大釵

叩鼓去則以釵遺主人相攻擊鳴鼓以集衆號有鼓者爲都老衆推服之唐末諸酋分據其地自爲刺史宋興始通中國奉正朔脩職貢間有桀黠貪利或疆吏失於撫御往往聚而爲寇抄掠邊戶朝廷禽獸畜之務在羈縻不深治也熙寧間以章惇察訪經制蠻事諸溪峒相繼納土願爲王民始荆城峒比之內地元祐初諸蠻復叛朝廷方務休息乃詔諭湖南北及廣西路並免追討廢堡砦棄五溪諸郡縣崇寧間復議開邊於是安化上三州及思廣諸峒蠻夷皆願納土輸貢賦及令廣西招納左右江四百五十餘峒尋以議者言以爲招致熟蕃

非便乃詔悉廢所置州郡復祖宗之舊焉紹興初監察御史明橐言湖南邊郡及二廣之地舊置溪峒歸明官比年寢廣其員及諸州措置隘砦闕人把拓又令管押兵夫素不習知法令率貪婪無厭况管押又皆鄉民甚爲邊患遭困苦折辱者往往無所赴愬議者欲俾帥臣籍其姓名每三年一遷易如州縣官故事或云止循舊添差並罷管押兵夫宜令二廣湖南帥臣處置適宜無啓邊禍以害遠人詔下其議三年安化蠻蒙全劔等八百人劫普議砦火其屋宇廣西帥臣遣縣砦將佐發兵討平之四年廣南東西路宣諭明橐言平觀二州本王

口高峯二砦處廣右西偏舊常無虞崇寧大觀間邊臣啓釁奏請置州拓境深入不毛如平從允孚庭觀溪駟叙樂隆兌等十有二州屬之黔南其官吏軍兵請給費用悉由內郡於是騷然莫能支吾政和間朝廷始悟其非罷之或者謂平州爲西南重鎮兼制王江從允等州及湖南之武岡軍湖北之靖州桂州之桑江峒徭觀州則控制南丹陸家砦茆灘十道及白崖諸蠻以故二州獨不廢臣自歷邊卽乞罷平觀者前後非一內攝官吳芾嘗充經畧司準備幹當頗得其詳觀州初爲宜州富仁監大觀間帥臣王祖道欲招納文蘭州都巡檢劉惟

忠謂得文蘭不若取南丹之利因誣其州莫公佞阻文
蘭不令納土爲公佞罪惟忠遂禽殺公佞帥司奏其功
乃改南丹爲觀州命惟忠守之公佞之死人以爲冤其
弟公晟結溪峒圖報復連歲攻圍惟忠中傷死繼以黃
璘代守璘度不能支辭疾告罷以岑利疆代之黃忱復
建議欲增築高峯砦於富仁監側爲觀聲援會朝廷罷
新邊遂請以高峯砦爲觀州設知州一人兵職官二人
曹官一人指使砦保官七人吏額五十人廂禁軍土丁
家丁又千餘人歲費錢一萬二千九百餘貫米八千八
百一十七石有奇州無稅租戶籍皆仰給鄰郡飛輓涉

險阻或遇蠻寇設伏陰發毒矢中人輒死人畏賊率委
棄道路縱然達州糜費亦不可勝計昔爲富仁監時不
聞有警惟是邊吏欲以刺探爲功故時時稱警急因以
爲利遂欲存而不廢也比年戶籍日削民多流離或轉
入溪洞公私困弊爲甚平州初隸融州亦羈縻州峒也
舊通湖北渠陽軍置融江砦及文村臨溪潯江堡後以
地隔生蠻遂廢崇寧間復隸融王口砦地接王江更爲
懷遠軍後更爲平江州更吉州爲從州王江爲允州並
隸黔南政和二年復廢邊吏黃忱李坦誰其帥臣程鄰
乞存平州設知州一人兵職官二人曹官一人縣令簿

二人提舉溪峒公事本州管界都同巡檢二人五砦堡
監官指揮十人吏額百人禁軍土丁千人歲費錢一萬
四千四百一十八貫六百文米一萬一千一百二十五
石有奇州無租賦戶籍轉運司歲移桂融象柳之粟以
給之及徙融州西北金溪鄉稅米四百九十餘石隸懷
遠廩費甚於觀州況守臣到任卽奏推恩其子州縣砦
堡例得遷官酬賞而稅場互市之利又爲守臣邊吏所
私獨百姓有征戍轉諭之苦誠爲可憫臣以爲宜罷平
觀二州便然尙有可議者觀州初爲富仁監時有銀治
二官取其利有常額熙寧元降條例具在宜先下經畧

司責公晟等依熙寧條例施行況公晟實公佞弟理宜
掌州事近雖逃歸未爲蠻族信服察其情勢不得不倚
重中國若乘時授之彼知恩出朝廷必深感悅樞密院
亦上言廣西沿邊堡砦昨因邊臣希賞改建州城侵擾
蠻夷大開邊釁地屬徼外租賦亦無所入而支費煩內
郡民不堪其弊遂皆廢罷唯平觀二州以帥臣所請故
存今覩明橐所奏利害之實昭然可見緣帥臣又稱公
晟於南丹觀州竇監境上不時竊發若廢二州恐於緣
邊事宜有所未盡詔令廣南西路帥漕憲司共條具利
害以聞旣而諸司交言平觀二州困弊已甚有害無益

請復祖宗舊制爲便詔從其言乾道六年詔補蒙澤進
武副尉初宜州蠻莫才都爲亂廣西經畧劉焯遣進勇
副尉蒙明質賊巢諭降才都旣而復肆猖獗戕賊官兵
未幾禽才都械送經畧司伏法悉破其黨而明亦遇害
備極慘酷邊人憐之焯乞推恩其子澤以旌死事朝廷
從之故有是命淳熙十年冬安化蠻突入內地焚砦柵
殺居民爲亂宜州駐劄將官田昭明與蠻力戰敗死之
十一年廣西路鈐轄沙世堅言官軍與瑤人兵器利鈍
不同宜勅沿邊軍州多置强弩毒矢以懼瑤人從之是
年安化蠻蒙光漸率衆抄掠世堅討平之初知宜州馬

寧祖不支思立砮鹽錢執議以爲前守所積逋止給錢一月不能遍及蠻部而權思立砮准備將領楊良臣復鎮撫乖方遂致激變光漸等詔罷良臣貶寧祖秩勅帥漕以時給溪峒鹽錢十二年正月廣西漕臣胡庭直上言邕州之左江永年太平等砮在祖宗時以其與交阯鄰壤實南邊藩籬重地故置州縣籍其丁壯以備一旦之用規模宏遠矣比年邊民率通交阯以其地所產鹽雜官鹽貨之及減易馬鹽以易銀忽而不防恐生邊釁所宜禁戢旣而諸司上言經畧司初準朝旨置馬鹽倉貯鹽以易馬歲給江上諸軍及御前投進用銀鹽錦采

與蠻互市其永平砦所易交趾鹽貨居民食皆舊制也
况邊民素與蠻夷私相貿易官不能制今一切禁絕非
惟左江居民乏鹽而蠻情亦叵測恐致乖異也乃牒邕
州禁民毋私販交趾鹽以妨鈔法是年詔以楊世俊襲
父進通職補承信郎紹熙初廣西帥以本路副總管沙
世堅素有韜畧累立邊功爲羣蠻所畏服嘗破蒙光漸
示以威信光漸不敢寇邊者累年乞以世堅兼知宜州
實能制伏蠻夷爲久遠之利帝從之慶元四年宜州蠻
蒙峒袁康等寇內地敎官鹽爲亂廣西帥司調官兵招
降之朝廷推賞有差嘉定三年章戡知靜江府建議以

爲廣西所部二十五郡三方鄰溪峒與蠻獠黎蛋雜處
跳梁負固無時無之西南最爲重地邕欽之外羈縻七
十有二地里綿邈鎮戍非一請增置雄邊軍二百人及
調憲司甲軍二百隸帥司初安平州李密侵鄰峒劫掠
編民併取古甌峒以其幼子變姓名爲趙懷德知峒事
戡論邕守推古甌一人主之十一年臣僚復上言慶曆
間張方平嘗以爲朝廷每備西北孰不知猺蠻衝突嶺
外南鄰交趾勢須經營唐時西備吐蕃其後安南寇邊
旋致龐勛之禍國朝每憂契丹元昊而儂智高陷邕州
南徼騷動天子爲之盱食豈細故哉臣等比見淮甸間

版築荐興更戍日益而廣南城隍摧圯不葺戍兵逃亡殆盡春秋教閱郡無百人雖有鄉兵義丁土丁之名實不足用緩急豈能集事宜於嶺南要地增築城堡籍其民兵歲時練習定賞罰格以示懲勸如此則號令嚴明守禦完固民習戰鬥可息獠蠻侵掠之患措四十州民於久安之域矣詔從之

廣源州蠻儂氏州在邕州西南鬱江之源地峭絕深阻產黃金丹砂頗有邑居聚落俗椎髻左衽善戰鬥輕死好亂其先韋氏黃氏周氏儂氏爲首領互相劫掠唐邕管經畧使徐申厚撫之黃氏納質而十三部二十九州

之蠻皆定自交阯蠻據有安南而廣源雖號邕管羈縻州其實服役於交阯初有儂全福者知儂猶州其弟存祿知萬涯州全福妻弟儂當道知武勒州一日全福殺存祿當道并有其地交阯怒舉兵執全福及其子智聰以歸其妻阿儂本左江武勒族也轉至儂猶州全福納之全福見執阿儂遂嫁商人生子名智高智高生十三年殺其父商人曰天下豈有二父耶因冒儂姓與其母奔雷火洞其母又嫁特磨道儂夏卿久之智高復與其母出據儂猶州建國曰大歷交阯攻拔儂猶州執智高釋其罪使知廣源州又以雷火頻婆四洞及思浪州附

益之居四年內怨交阯襲據安德州僭稱南天國改年
景瑞皇祐元年寇邕州明年交阯發兵討之不克廣西
轉運使蕭固遣邕州指使开贊往刺候而贊擅發兵攻
智高爲所執因問中國虛實贊頗爲陳大畧說智高內
屬乃遣贊還奉表請歲貢方物未聽又以馴象金銀來
獻朝廷以其役屬交阯拒之後復齎金函書以請知邕
州陳珙上聞不報智高旣不得請又與交阯爲仇且擅
山澤之利遂招納亡命數出敝衣易穀食給言洞中飢
部落離散邕州信其微弱不設備也乃與廣州進士黃
瑋黃師宓及其黨儂建侯儂志忠等日夜謀入寇一夕

焚其巢穴給其衆曰平生積聚今爲天火焚無以爲生計窮矣當拔邕州據廣州以自王否則兵死四年四月率衆五千沿鬱江東下攻破橫山砦遂破邕州執知州陳珙等兵死千餘人智高閱軍資庫得所上金函怒謂珙曰我求一官統攝諸部汝不以聞何也珙對嘗奏不報索奏草不獲遂扶珙出珙惶恐呼萬歲求自効不聽乃并其屬及廣西都監張立害之立臨刑大罵不爲屈於是智高僭號仁惠皇帝改年啓歷赦境內師宓以下皆稱中國官名是時天下久安嶺南州縣無備一旦兵起倉卒不知所爲守將多棄城遁故智高所嚮得志相

繼破橫貴龔潯藤梧封康端九州害曹覲于封州趙師
巨馬貴于康州餘殺官吏甚衆所過焚府庫進圍廣州
初智高將至守將仲簡不許民入保城中民不得入者
皆附智高智高勢益張先是魏瓘築州城鑿井畜水作
大弩爲守備至是智高爲雲梯土山攻城甚急又斷流
水而城堅井飲不竭弩發中輒洞潰智高力屈會知英
州蘇緘屯兵邊渡村扼其歸路番禺縣令蕭注募土丁
及海上疆壯二千餘人與智高衆格鬪焚其戰艦轉運
使王罕亦自外至益脩守備智高知不可拔圍五十七
日七月壬戌解去繇清遠濟江擁婦女作樂而行遇張

忠戰于白田忠死之去攻賀州不克夜害蔣偕于太平場九月庚申破昭州害王正倫等于館門驛州之山有數穴大可容數百千人民聞兵至走匿其中智高知之縱火皆焚死十月丁丑破賓州甲申復據邕州日夜伐木治舟楫楊言復趨廣州十二月壬申又敗陳曙于金城驛初智高以反聞朝廷命曙就擊之旣而楊旼曹脩張忠蔣偕相繼出又以余靖孫沔爲安撫使旼脩聞智高至退軍避之忠偕勇而無謀皆死智高益自恣南土騷然仁宗以爲憂命狄青爲宣撫使諸將皆受青節制曙恐青至有功亟挑戰故敗五年正月青及沔靖會兵

賓州官軍土丁合三萬一千餘人按軍法誅曙及指揮使袁用等三十一人于坐一軍大振於是進兵青將前陣沔將次陣靖將後陣以一晝夜絕崑崙關歸仁鋪智高聞王師絕險而至出其不意悉衆來拒執大盾擲槍衣絳衣望之如火青陣少却先鋒孫節死之青起麾蕃落騎兵張左右翼出其後交擊左者右右者左已而左者復左右者復右其衆不知所爲大敗走會日暮智高復趨邕州夜焚城遁由合江口入大理國得屍五千三百四十一築爲京觀所掠生口萬餘人復其業獲僞印尤黃師宓而下僞官五十七人梟其首城上收馬牛金

帛以鉅萬計智高自起兵幾一年暴踐一方如行無人之境吏民不勝其毒朝廷爲下赦令優除復慰拊瘡痍百姓始得更生云先是謠言農家種糴家收已而智高叛爲青破皆如其謠智高母阿儂有計謀智高攻陷城邑多用其策僭號皇太后性慘毒嗜小兒肉每食必殺小兒智高敗走阿儂入保特磨依其夫儂夏卿收殘衆得三千餘人習騎戰復欲入寇至和初余靖督部吏黃汾黃獻珪石鑑進士吳舜舉發峒兵入特磨掩襲之獲阿儂及智高弟至光子繼宗繼封檻至京師初未欲殺日給食飲欲以誘出智高或傳智高死乃悉棄市旣而

西川復奏智高未死謀寇黎雅州詔本路爲備御史中丞孫抃又請勅益州先事經制以安蜀人然智高卒不出其存亡莫可知也儂氏又有宗旦者知雷火洞稍桀黠嘉祐二年嘗入寇知桂州蕭固招之內屬以爲忠武將軍又補其子知温悶峒日新爲三班奉職七年宗旦父子請以所領雷火計城諸峒屬縣官願得歸樂州永爲王民詔各遷一官以宗旦知順安州仍賜耕牛鹽綵是歲儂夏卿儂平儂亮亦自特磨來歸皆其族也日新後嘗監邕州稅治平中宗旦與交趾李日尊劉紀有隙畏偏知桂州陸詵因使人說之遂棄其州內徒命爲右

千牛衛將軍

有甲峒蠻者亦役屬交趾間出寇邕州景祐三年嘗掠思陵州憑祥峒生口殺登龍鎮將而去嘉祐五年合交趾門州等蠻五千餘人復爲寇與官兵拒戰斬首數百詔知桂州蕭固趨邕州發諸郡兵與轉運使宋咸提點刑獄李師中合議追討是歲數入寇又詔安撫使余靖擊之蘇茂州蠻亦近邕州至和嘉祐中皆嘗擾邊

黎峒唐故瓊管之地在大海南距雷州泛海一日而至其地有黎母山黎人居焉舊說五嶺之南人雜夷獠朱崖環海豪富兼井役屬貧弱婦人服緦縵績木皮爲布

陶土爲釜器用瓠瓢人飲石汁又有椒酒以安石榴花
著甕中卽成酒俗呼山嶺爲黎居其間者號曰黎人弓
刀未嘗去手弓以竹爲弦今儋崖萬安皆與黎爲境其
服屬州縣者爲熟黎其居山峒無征徭者爲生黎時出
與郡人互市至和初有黎人符護者邊吏嘗獲其奴婢
十人還之符護亦嘗犯邊執瓊崖州巡檢慕容允則及
軍士至是以軍士五十六人與允則來歸允則道病死
詔軍士至者貸其罪乾道二年從廣西經畧轉運司議
詔海南諸郡倅守慰撫黎人示以朝廷恩信俾歸我省
地與之更始其在乾道元年以前租賦之負逋者盡赦

免之能來歸者復其租五年民無產者官給田以耕亦復其租五年守倅能慰安黎人及收復省地者視功大小爲賞有差失地及民者有重罰六年黎人王用休爲亂權萬安軍事同主管本路巡檢孫滋等招降之九年八月樂昌縣黎賊劫省民焚縣治爲亂黎人王日存王承福陳顏招降之瓊管安撫司上其功得借補承節郎淳熙元年詔承節郎王日存子孫許襲職四年冬萬安軍王利學寇省地蓋旻進率衆拒之兵弱戰沒八年六月詔三十六峒都統領王氏女襲封宜人初王氏居化外累世立功邊陲皆受封爵紹興間瓊山民許益爲亂

王母黃氏撫諭諸峒無敢從亂者以功封宜人至是黃氏年老無子請以其女襲封朝廷從之十二年正月樂會縣白沙峒黎人王邦佐等率賊衆五百爲寇殺掠官軍保義郎陳升之撫降其衆俘獲林智福等瓊管司上其功詔減升之三年磨勘十六年詔以大寧砦黃弼補承信郎彈壓本界黎峒瓊管司言弼沉鷺有謀爲遠近推服故用之弼宜人黃氏姪也嘉定九年五月詔宜人王氏女吳氏襲封統領三十六峒

環州蠻區氏州隸宜州羈縻領思恩都毫二縣有區希範者思恩人也狡黠頗知書嘗舉進士試禮部景祐五

年與其叔正辭應募從官軍討安化州叛蠻既而希範擊登聞鼓求錄用事下宜州而知州馮伸己言其妄編管全州正辭亦嘗自言功不報二人皆失望希範後輒遁歸與正辭率其族人及白崖山酋蒙趕荔波峒蠻謀爲亂將殺伸己且曰若得廣西一方當建爲大唐國會。有日者石太清至因使之筮太清曰君貴不過封侯乃令太清擇日殺牛建壇場祭天神推蒙趕爲帝正辭爲奉天開基建國柱王希範爲神武定國令公桂州牧皆北嚮再拜以爲受天命又以區丕績爲宰相餘皆僞立名號補置四十餘人慶歷四年正月十三日率衆五百

破環州劫州印焚其積聚以環州爲武城軍又破帶溪
砦下鎮寧州及普義砦有衆一千五百宜州捉賊李德
用出韓婆嶺擊卻之前後斬獲甚衆俘偏將二希範懼
入保荔波峒間出拒官軍朝廷下詔購之獲希範正辭
及趕者大賜袍帶錢三十萬鹽千斤明年轉運使杜杞
大引兵至環州使攝官區擘進士曾子華宜州校吳香
誘趕等出降殺馬牛具酒給與之盟置曼陀羅花酒中
飲者皆昏醉稍呼起問勞至則推仆後廡下比暮衆始
覺驚走而門有守兵不得出悉擒之後數日又得希範
等凡獲二百餘人誅七十八人餘皆配徙仍醢希範賜

宋史卷四百九十五 列傳
諸溪峒續其五藏爲圖傳於世餘黨悉平鎮寧州亦隸
宜州景祐三年蠻酋莫陵等七百餘人內寇遣西京作
坊使郭志高閣門祇候梁紹熙往討未至陵等詣桂宜
州巡檢李仲政請降廣西轉運使不俟詔貸其罪詔劾
之已而釋之是歲高竇州狄獠陳友朋等亦寇海上本
路會兵擊之潰去

宋史卷四百九十五

宋史卷四百九十六

元中書右丞相總裁脫脫等修

列傳第二百五十五

蠻夷四

西南諸夷

黎州諸蠻

叙州三路蠻

威茂渝州蠻

黔涪施高徼外諸蠻

瀘州蠻

西南諸夷漢牂牁郡地武帝元鼎六年定西南夷置牂牁郡唐置費玕莊琰播郎牂牁牂夷等州其地北距克州百五十里東距辰州二千四百里南距交州一千五

百里西距昆明九百里無城郭散居村落土熱多霖雨
稻粟皆再熟無徭役將戰征乃屯聚刻木爲契其法劫
盜者償其主三倍殺人者出牛馬三十頭與其家以贖
死病疾無醫藥但擊銅鼓銅沙鑼以祀神風俗與東謝
蠻同隋大業末首領謝龍羽據其地勝兵數萬人唐末
王建據西川由是不通中國後唐天成二年牂牁清州
刺史宋朝化等一百五十人來朝其後孟知祥據西川
復不通朝貢乾德三年平孟昶五年知西南夷南寧州
蕃落使龍彥瑫等遂來貢詔授彥瑫歸德將軍南寧州
刺史蕃落使又以順化王武才爲懷化將軍武才弟若

啓爲歸德司階武龍州部落王子若溢東山部落王子若差羅波源部落王子若臺訓州部落王子若從雞平部落王子若冷戰洞部落王子若磨羅母殊部若王子若母石人部落王子若藏竝爲歸德司戈開寶二年武才等一百四十人又來貢以武才爲歸德將軍來人乞賜武才鈿函手詔以舊制所無不許四年其國人詣涪州言南寧州蕃落使龍彥瑫卒歸德將軍武才及八刺史狀請以彥瑫子漢塘爲嗣詔授漢塘南寧州刺史兼蕃落使八年三十九部順化王子若發等三百七十七人來貢馬百六十四匹丹砂千兩太平興國五年夷王龍

瓊瑠遣其子羅若從并諸州蠻七百四十四人以方物名馬來貢六年保州刺史董奇死以其子紹重繼之雍熙二年八月奉化王子以慈等三百五十人以方物來貢夷王龍漢璿自稱權南寧州事兼蕃落使遣牂牁諸州酋長趙文橋率種族百餘人來獻方物名馬并上蜀孟氏所給符印授漢璿歸德將軍南寧州刺史以文橋等竝爲懷化司戈端拱二年漢璿又貽書五溪都統向通漢約以入貢淳化元年漢璿遣其弟漢興來朝三年夷王龍漢興及都統龍漢瑋刺史龍光顯龍光盈及順化王雨滯等各貢馬朱砂至道元年其王龍漢瑋遣其

使龍光進率西南牂牁諸蠻來貢方物太宗召見其使
詢以地理風俗譯對曰地去宜州陸行四十五日土宜
五穀多種秧稻以木弩射麋鹿克食每三二百戶爲一
州州有長殺人者不償死出家財以贖國王居有城郭
無壁壘官府惟短垣光進之說與前書所記小異故并
叙之上因令作本國歌舞一人吹瓢笙如蚊蚋聲良久
數十輩連袂宛轉而舞以足頓地爲節詢其曲則名曰
水曲其使十數輩從者千餘人皆蓬髮面目黧黑狀如
猿猱使者衣虎皮羶裘以虎尾插首爲飾詔授漢瑋寧
遠大將軍封歸化王又以歸德將軍羅以植爲安遠大

將軍保順將軍龍光盈龍光顯竝爲安化大將軍光進等二十四人竝授將軍郎將司階司戈其本國使從者有甲頭王子刺史判官長史司馬長行僸人七等之名咸平元年其王龍漢曉遣使龍光腆又率牂牁諸蠻千餘人來貢詔授光腆等百三十人官三年都部署張文黔來貢五年漢曉又遣牙校率部蠻千六百人馬四百六十匹并藥物布帛等來貢賜冠帶於崇德殿厚賚遣還六年知全州錢絳請招誘溪峒名豪上以生事寢其奏不報景德元年詔西南牂牁諸國進奉使親至朝廷者令廣南西路發兵援之勿抑其意先是龍光進等來

朝上矜其道遠人馬多斃因詔宜州自今可就賜恩物至是懇請詣闕從之二年詔羈縻保霸州刺史董紹重董忠義歲賜紫綾錦袍四年西南蠻羅寶井都指揮使顏士龍等來貢士龍種落遐阻未嘗來朝今始至詔館餼賜予如高溪州大中祥符元年瀘州言江安縣夷人殺傷內屬戶害巡檢任賽既不自安遂爲亂詔遣閤門祇候侍其旭乘傳招撫旭至蠻人首罪殺牲爲誓未幾復叛旭因追斬數十級擒其首領三人又以衣服紬布誘降蠻斗婆行者將按誅其罪上以旭召而殺之違招安之實卽降詔戒止且令篤恩信設方略制禦無尚討

伐以滋驚擾二年旭言夷人恃巖險未卽歸服詔文思副使孫正辭等爲都巡檢使乃分三路入其境脅以兵威皆震懼伏罪三年正辭言夷人安集降詔嘉獎先有蠻羅忽餘甚忠順防援并監捕殺違命者不已上遣內臣郝昭信褒慰之且諭以赦蠻黨前罪勿復邀擊四年茂州夷族首領耆老刑牛犬於三溪誓不侵擾州界又峽路鈐轄執爲亂夷人王羣體等至闕下上曰蠻夷不識教義向之爲亂亦守臣失於綏撫竝免死分隸江浙遠地其年霸州董喆爲其巡檢使董延早所殺五年黎洞夷人互相殺害巡檢使發兵掩捕上聞而切責之曰

蠻夷相攻許邊吏和斷安可擅發兵甲或致擾動卽令
有司更選可任者代之五年晏州多剛縣夷人斗望行
脾率衆劫清井監殺駐泊借職平言大掠資畜知瀘州
江安縣奉職文信領兵趨之遇害民皆驚擾走保戎州
轉運使寇瑊卽令諸州巡檢會江安縣集公私船百餘
艘載糧甲張旗幟擊銅鑼鼓吹自蜀江下抵清浮埧樹
營柵招安近界夷族諭以大兵將至勿與望等同惡未
幾納溪藍順州刺史个松生南八姓諸團烏蠻獨廣王
子界南廣溪移悅等十一州刺史李紹安山後高鞏六
州及江安界娑婆村首領竝來乞盟立竹爲誓門刺猫

狗雞血和酒飲之誓同力討賊賊乃署勝許以官軍至
不殺其老幼給賜衣幣酒食上遣內殿崇班王懷信乘
傳與瑊等議綏撫方略瑊言斗望等屢爲寇鈔恃寬赦
不悛惡令請發嘉肴屯兵捕剪以震懼之六年九月詔
懷信爲嘉肴戎瀘等州水陸都巡檢使閣門祗候康訓
符承訓爲都同巡檢使及發虎翼神虎等兵三千餘人
令懷信與瑊商度進討上因謂樞密使陳堯叟曰往時
孫正辭討蠻有虎翼小校率衆冒險者三人朕志其姓
名今以配懷信正辭嘗料簡鄉丁號白芳子兵以其識
山川險要遂爲鄉導今亦令懷信召募又使臣宋賁屢

規畫溪洞事適中機要以賁知江安縣與懷信等議事
瑛乃點集昌盧富順監白芳子弟得六千餘人十一月
懷信康訓分領緣溪入合灘至生南界斗蒲村遇夷賊
二千餘人擊之殺傷五百人奪梭槍藤牌會暮收衆保
砦夷黨三千餘人分兩道張旗喊呼來逼砦柵懷信出
擊皆潰散進壁娑娑遇夷二千于羅募村又破之追至
斗行村上屏風山連破四砦一日三戰俘馘百餘人奪
資糧五千石槍刀什器萬數焚羅固募斗引等三十餘
村庵舍三千區懷信又引兵至斗行村追擊過盧羅射
仆二百餘人焚其欄柵千數分遣部下於羅箇頰羅能

落運等村及龍峨山掩殺大獲戎具斬首級及重傷投崖死者頗衆燒舍千區及積穀累萬兩路兵會于涇灘置砦遣康訓部壕砦卒修涇灘路以度大軍俄爲夷賊所邀戰不利訓顛于崖死之懷信引兵急擊大敗之追斬至涇灘懷信夾砦于晏江口城與符承訓偵知賊謀欲乘夜擊晏江馳報懷信卽自涇灘拔砦赴之比至晏江北山夷衆萬餘已自東南合勢逼懷信砦懷信毅強弩環砦射賊城等整衆乘高策援夷人大懼而却合擊破之死傷千餘人七年正月其會斗望三路分衆來鬪又爲官軍大敗射殺數百人溺江水死者莫計夷人震

龍喜詣軍首服納牛羊銅鼓器械城等依詔撫諭二月還
軍消井夷首斗望及諸村首領悉赴監自陳願貸死永
不寇盜邊境因殺三牲盟誓辭甚懇苦卽犒以牢酒感
悅而去城懷信等上言夷人寧息請置消井監壕柵并
許近界市馬從之八年夔州路上言南寧州夷族張聲
進遣使進奉爲蕃落使龍漢境邀奪讐劫不已乞降勅
書安撫天聖四年龍光疑康定元年龍光琇景祐三年
龍光辨慶歷五年龍以特皇祐二年龍光澈等繼以方
物來貢獻與以特俱至者七百十九人是年以安遠將
軍知蕃落使龍光辨爲寧遠軍大將軍寧遠將軍知靜

蠻軍節度使龍光凝承宣武寧大將軍龍異豈竝爲安
遠大將軍承宣奉化大將軍龍異魯爲武寧大將軍至
和中龍以烈龍異靜首領張漢陞王子羅以崇等皆入
貢命其首領而下九十三人爲大將軍至郎將嘉祐中
以烈復至大率龍姓諸部族地遠且貧熙寧中來見賜
以袍帶等物刺其數於背又有張玉石自品者嘉祐中
來貢而鷓州亦遣人貢馬有董氏世知保州曰仲元者
襲是州二十餘年矣至是益州鈐轄司表其善拊蠻夷
命爲本州刺史鷓州保州皆西南邊地也又有夷在瀘
州部亦西南邊地所部十州曰鞏曰定曰高曰奉曰清

曰宋曰納曰晏曰投附曰長寧皆夷人居之依山險善寇掠清井監者在夷地中朝廷置吏領之以拊御夷衆或不得人往往生事慶歷四年四月夷人攻三江砦詔秦鳳路總管司發兵千人選官馳往捕擊旣而瀘州教練使生南招安將史愛誘降夷賊斗敖等詔竝補三班差使殿侍清井監一路招安巡檢未幾夷衆復寇三江砦指使王用等擊走之皇祐元年二月夷衆萬餘人復圍清井監水陸不通者甚久初監戶晏州夷人錢而歐傷斗落妹其衆憤怒欲報之知瀘州張昭信勸諭旣已聽服而清井監復執婆娑然村夷人細令等殺長寧州落

占等十人故激成其亂詔知益州田况發旁郡士卒命梓夔路兵馬鈐轄宋定往援之於是兩路合官軍泊白芳子弟幾二萬人與戰兵死者甚衆饑死又千餘人數月然後平賜况及轉運使勅書褒獎宋定而下十三人進秩有差後况還朝乃奏夷衆連年爲亂繇主者非其人請令轉運鈐轄司舉官爲知監監押代還日特遷一資從之嘉祐二年三里村夷斗還等百五十人復謀內寇有黃土坎夷斗蓋長寧州人也先以其事來告清井監引兵趨之捕斬七千餘級鈐轄司上聞詔賜斗蓋錢三十萬錦袍銀帶明年又補斗蓋長寧州刺史瀘州部

舊領姚州廢已久有烏蠻王子得蓋者來居其地部族最盛數遣人詣官自言願得州名以長夷落事聞因賜號姚州鑄印予之得蓋又乞勅書一通以遺子孫詔從其請夔州路又有溱南二州夷頗盛彊皇祐初詔自今歲遣使者存問之雅州西山野川路蠻者亦西南夷之別種也距州三百里有部落四十六唐以來皆爲羈縻州太平興國三年首領馬令膜等十四人以名馬犂牛虎豹皮麝臍來貢并上唐朝勅書告身凡七通咸賜以冠帶其首領悉授官以遺之紹聖二年以礪門砦蠻畿王元壽襲懷化司戈云

黎州諸蠻凡十二種曰山後兩林蠻在州南七日程曰
邛部州在州東南十二程曰風琶蠻在州西南一千一
百里曰保塞蠻在州西南三百里曰三王蠻亦曰部落
蠻在州西百里曰西箐蠻有彌羌部落在州西三百里
曰淨浪蠻在州南一百五十里曰白蠻在州東南一百
里曰烏蒙蠻在州東南千里曰阿宗蠻在州西南二日
程凡風琶兩林邛部皆謂之東南其餘小蠻各分隸焉
邛部於諸蠻中最驕悍狡譎招集蕃漢亡命侵攘他種
閉其道以專利曰大雲南蠻曰小雲南蠻卽唐南詔今
名大理國自有傳夷俗尚鬼謂主祭者鬼主故其酋長

號都鬼主後唐天成間始來貢開寶二年六月壬子勿兒遣部落將軍離魚以狀白黎州期十月內入貢成都府以聞詔嘉答之至是來朝賜以器幣由黎州南行七日而至其地又一程至鶴州鶴州今廢空城中但有浮圖一又二程至建昌城又十七程至雲南三年七月又朝貢六年四月邛部州歸德將軍阿伏上言爲山後兩林蠻勿兒率衆侵掠堡砦八年懷化將軍勿尼等六十餘人來貢詔以勿尼爲歸德將軍又以兩林蠻大鬼主蘇吠爲懷化將軍太平興國二年遣使王子卑綵副使牟蓋鬼主還祖等七十八人以名馬來貢乞頒正朔下

詔曰山後兩林蠻主歸德將軍勿尼懷化將軍勿兒等
克慕聲明遠脩職貢竝增環衛之秩俾爲夷落之榮勿
尼可特授歸德大將軍勿兒可特授懷化大將軍是冬
又遣使離魚貢犀二株馬九匹來賀登極四年勿兒與
都鬼主又遣王子祚遇以名馬來貢八年蠻主弟牟昂
及王子牟蓋摩忙卑愧副使牟計等二百三十九人來
貢詔以牟昂爲懷化大將軍牟蓋等三人爲歸德郎將
牟計等百二十人竝爲懷化司戈雍正三年勿尼等及
其王子李奉恩復來貢馬淳化元年王子離魚副使卑
都卑諭鬼主岐禮等百二十八人來貢詔授離魚歸德

將軍卑都保順郎將卑諭歸德司戈卑熱等五十四人
懷化司戈天禧二年山後兩林百蠻都鬼主李阿善遣
將軍卑熱等一百五十人來貢

邛部州蠻亦曰大路蠻亦曰勿鄧居漢越嶲郡會無縣
地其酋長自稱百蠻都鬼主開寶三年六月都鬼主阿
伏白黎州期以十月令王子入貢成都府以聞詔嘉納
之四年黎州定遠兵士構叛聚居鹿角溪阿伏令弟遊
擊將軍卑吠等率衆平之詔賜阿伏銀帶錦袍并賜其
衆銀帛各百以爲歸德將軍六年阿伏與山後兩林蠻
主勿兒言語相失勿兒率兵侵邛部州頗俘殺部落黎

州以聞竝賜詔慰諭令各守封疆勿相侵犯太平興國
四年首領牟昂諸族鬼主副使離襪等各以方物來貢
雍熙二年都鬼主諾驅并其母熱免遣王子阿有等百
七十二人以方物名馬來貢詔以諾驅爲懷化將軍并
賜其母銀器端拱二年遣弟少蓋等三百五十人來貢
籍田貢御馬十四匹馬二百八十四匹犀角二象牙二莎
羅毯一合金銀飾蠻刀二金飾馬鞍勒一具獐羊十羖
牛六詔以少蓋爲歸德郎將淳化元年諾驅自部馬二
百五十匹至黎州求互市詔增給其直諾驅令譯者言
更入西蕃求良馬以中市二年復遣子牟昂叔離襪以

方物良馬犀牛來貢仍乞加恩詔授諾驅懷化大將軍
少蓋懷化將軍牟昂歸德將軍離襪懷化司戈又封諾
驅母歸德郡太君熱免寧遠郡太君弟離遮小男呵醉
都判官任彥德等一百九十一人爲懷化司戈至道元
年李淳亂西川王繼恩討平之遣嘉州牙校辛顯使諾
驅奉淳化二年所授官告敕書及日曆爲信因言與賊
樊秀等接戰敗之復請朝覲通嘉州舊路繼恩上言通
嘉州路非便只令於黎州賣馬詔不允其入覲王子一
十九人竝加官鬼主三十六人竝賜勅書以撫之至道
三年遣王子阿醉來朝真宗咸平二年遣王子部的等

來貢文犀名馬賜衣帶器幣有差又乞給印以大渡河
南山前後都鬼主爲文從之五年又遣王子離歸等二
百餘人入貢六年黎州言邛部州都蠻王諾驅卒其子
阿適立景德二年阿適遣王子將軍百九十二人來貢
詔授阿適安遠將軍阿適叔懷化將軍阿育爲歸德將
軍離歸爲懷化將軍大判官懷化司候任彥德王子將
軍部的竝爲懷化郎將判官任惟慶爲懷化司候大中
祥符元年遣將軍趙勿娑等獻名馬犀角象齒娑羅毯
會于泰山禮畢阿道加恩勿娑等厚賜遣還天聖八年
十月邛部州都蠻王黎在遣卑郎離滅等來貢方物時

占城龜茲沙州亦皆入貢至以家自隨晏殊因請圖其人物衣冠并訪道里風俗以上史官詔可九年三月命黎在爲保義將軍又命其部族爲郎將司戈司候凡三十餘人明道元年黎州言黎在請三歲一貢詔諭以道路遐遠聽五年一至景祐初黎州復言邛部蠻請歲入貢詔如明道令寶元元年百蠻都王忙海遣將軍卑蓋等貢方物且請三歲一貢不許慶歷四年邛部州山前由後百蠻都鬼主牟黑遣將軍阿濟等三百三十九人獻馬二百一十犛牛一大角羊四犀株一莎羅毯一慶歷間有都鬼主弁黑等入貢未幾其王咩墨擾邊知黎

州孫固使其首領苴尅殺之熙寧三年苴尅遣使來賀
登寶位自稱大渡河南邛部州山前山後百蠻都首領
賜敕書器幣襲衣銀帶是年苴尅死詔以其子韋則爲
懷化校尉大渡河南邛部州都鬼主九年遣其將軍卑
郎等十四人入貢乾道元年詔以崖鞞襲兄蒙備金紫
光祿大夫懷化校尉都鬼主如故淳熙元年吐蕃寇西
邊崖鞞率衆掩擊詔嘉其功二年五月兩林蠻王弟籠
畏及酋長崖來率部義等攻邛部州之籠襲城不克大
掠而去崖鞞追之不及制置使范成大檄黎州嚴加備
禦八年崖鞞死其姪墨崖襲職詔黎州屯戍土軍禁軍

及西兵遇有邊事竝聽本州守臣節制嘉定九年邛部
州逼於雲南遂伏屬之其族素效順捍禦邊陲旣折歸
雲南失西南一藩籬矣

風琶蠻咸平初其王曩蒞遣使烏栢等貢馬五十七匹
素地紅花娑羅毯二來賀卽位詔授曩蒞及進奉使等
官優賜遣之景德三年又遣烏栢來貢詔授曩蒞歸德
將軍烏栢等四十六人弟遷郎將司階司戈

寶塞蠻開寶間其蠻七十餘人由大渡河來歸時時來
貨其善馬紹興二十七年川秦都大司言漢地民張太
二姑率衆劫殺市馬蠻客崖遇等恐啓邊釁已加慰諭

併償其直矣詔免知州唐柎及通判陳伯強官抵首賊
法

部落蠻有劉楊郝三姓淳熙七年十月黎州五部落蠻
貢馬三百匹求內附詔許通互市卻其所獻馬彌羌部
落乾道九年吐蕃青羌以知黎州宇文紹直不讐其馬
價憤怨爲亂詔師憲撫安之紹直罷免青羌首領奴兒
結等市馬黎州大肆虜掠權州事王昉多給金帛亟遣
還宣撫使虞允文言昉貪功恐他部効尤漸啓邊釁詔
降昉兩官十月黎州吐蕃復寇邊攻虎掌砦詔四川宣
撫司檄成都府調兵二千人戍黎州以禦之淳熙二年

奴兒結還所虜生口三十九人黎州與之盟復聽其互
市給賞歸之制置使范成大言所虜未盡歸我豈可復
與通好詔謫宇文紹直編管千里外成大增黎州五砦
籍強壯五千人爲戰兵吐蕃入寇之徑凡十有八皆築
堡戍之奴兒結率衆二千扣安靜砦成大調飛山卒千
人赴之度其三日必遁戒勿追已而果然青羌奴兒結
爲邊害者十餘年其後制置使留正以計禽殺之盡殲
其黨淳熙十二年趙汝愚代爲制置使或謂殺降不祥
必啓邊患汝愚不爲動但分守險要嚴備以待之明年
奴兒結弟三開果入寇邊備完固三開不能攻走歸汝

愚縣重賞以間羣蠻三開不能孤立遂以憂死時虛恨
蠻族最強破小路蠻併其地與黎州接壤請通互市汝
愚以黎州三百被邊若更通虛恨蠻恐重貽他日之憂
不若拒之爲便帝以其知大體從之尋汝愚以定青羌
功加龍圖閣直學士嘉定元年十二月彌羌蓄卜由惡
水渡河寇黎州破碉子砦初蓄卜弟悶巴至三衝爲人
所殺又徒白水村渡於安靜砦羌人患之蓄卜遂與青
羌詣邛部州欲假道女兒城以入寇守臣楊子謨諜知
之數以貲遺其都王母俾母假道時時餽米以濟其饑
蠻人德之會趙公庀代爲郡靳不與蓄卜遂得假道渡

河攻茆坪砦掠三松蠶砂橫山三增白羊諸村郡遣西
兵將党壽禦之失利復遣統領王光世往羌人由茆坪
以革船渡河光世憚之留屯三衝不敢進羌人焚掠旣
盡渡河而歸二年二月復寇黎州良溪砦官軍敗績八
年二月蓄卜降蓄卜連年入寇皆青羌曳失索助之守
臣袁栢遣安靜砦總轄杜軫招降之地如浮浪蠻白蠻
烏蒙蠻阿宗蠻則其地各有所服屬云

叙州三路蠻西北曰董蠻正西曰石門部東南曰南廣
蠻董蠻在馬湖江右夔侯國也唐羈縻馴騁浪商四州
之地其酋董氏宋初有董春惜者貢馬自稱馬湖路三

十七部落都王子其地北近犍爲之沐川賴因砦砦阨
蠻險蠻數寇抄熙寧紹聖中朝廷皆爲徙賴因監押駐
榮丁砦而以縣吏控截政和五年始改差監押充知砦
事蠻寇掠如故南廣蠻在叙州慶符縣以西爲州十有
四大觀三年有夷酋羅永順楊光榮李世恭等各以地
內屬詔建滋純祥三州後皆廢石門蕃部與臨洮土羌
接唐曲播等十二州之地俗椎髻披氍佩刀居必欄棚
不喜耕稼多蓄牧其人精捍善戰鬥自馬湖南廣諸族
皆畏之蓋古浪稽魯望諸部也

威州保霸蠻者唐保霸二州也天寶中所置後陷没酋

董氏世有其地與威州相錯因羈縻焉保州有董仲元
霸州有董永錫者嘉祐及熙寧中皆嘗請命於朝政和
三年知成都龐恭孫始建言開拓置官吏於是董彛
咨保州地爲祺州董彛博霸州地爲亨州授彛咨刺史
彛博團練使彛咨尋遷觀察使彛博留後遂爲節度使
詔成都給居第田十二頃二州經費歲用錢一萬二千
一百緡米麥一萬四千七百石絹二千八百五十匹紬
布綾綿茶鹽銀等不預焉後皆爲此

茂州諸部落蓋塗靜當直時飛宕恭等九州蠻也蠻自
推一人爲州將治其衆而常詣茂州受約束茂州居羣

蠻之中地不過數十里宋初無城隍惟植鹿角自固蠻乘夜屢入寇民甚苦之熙寧八年相率詣州請築城知州事范百常實主是役蠻以爲侵其地率衆奄至百常擊走之乃合靜時等蠻來寇百常拒守凡七十日詔遣王中正將陝西兵來援入恭州宕州誅殺頗衆蠻乃降政和五年有直州將至永壽湯延俊董承有等各以地內屬詔以永壽地建壽寧軍延俊承有地置延寧軍時威州亦建亨祺二州然亨至威纔九十里壽寧距茂纔五里在大旱江之外非扼控之所未幾皆廢七年塗靜時非等州蠻復反茂州殺掠千餘人知成都周燾遣兵

馬鈴轄張永鐸等擊之畏懦不敢進皆坐黜以孫義叟
節制綿茂軍於是中軍將种友直等破其都祿板舍原
諸族蠻敗散其酋旺烈等詣茂州請降乃班師授旺烈
官月給茶綵自後蠻亦驕宣和五年宥恭直諸部落入
寇六年塗靜蠻復犯茂州云

渝州蠻者古板楯七姓蠻唐南平獠也其地西南接烏
蠻昆明哥蠻大小播州部族數十居之治平中熟夷李
光吉梁秀等三族據其地各有衆數千家間以威勢脅
誘漢戶有不從者屠之没入土田往往投充客戶謂之
納身稅賦皆里胥代償藏匿亡命數以其徒僞爲生獠

劫邊民官軍追捕輒遁去習以爲常密賂黠民覘守令
動靜稍築城堡繕器甲遠近患之熙寧三年轉運使孫
固判官張詵使兵馬使馮儀弁簡杜安行圖之以禍福
開諭因進兵復賓化砦平蕩三族以其地賦民凡得租
三萬五千石絲綿一萬六千兩以賓化砦爲隆化縣隸
涪州建榮懿扶歡兩砦其外銅佛垵者隸渝州南川縣
地皆膏腴自光吉等平他部族據有之朝廷因補其土
人王才進充巡檢委之控扼才進死部族無所統數出
盜邊朝廷命熊本討平之建爲南平軍以渝州南川涪
州隆化隸焉元豐四年有楊光震者助官軍破乞弟殺

其黨阿訛大觀二年木攀首領趙泰播州夷族楊光榮各以地內屬詔建溱播二州後皆廢

黔州涪州徼外其西南夷部漢牂牁郡唐南寧州牂牁昆明東謝南謝西趙兗州諸蠻也其地東北直黔涪西北接嘉叙東連荆楚南出宜桂俗椎髻左衽或編髮隨畜牧遷徙亡常喜險阻善戰鬪部族共一姓雖各有君長而風俗略同宋初以來有龍蕃方蕃張蕃石蕃羅蕃者號五姓蕃皆常奉職貢受爵命治平四年十二月知靜蠻軍蕃落使守天聖大王龍異閣等入見詔以異閣爲武寧將軍其屬二百四十一人各授將軍及郎將熙

寧元年有方異現三年有張漢興各以方物來獻授異
現靜蠻軍漢興捍蠻軍竝節度使六年龍蕃羅蕃方蕃
石蕃八百九十人入覲貢丹砂瓊馬賜袍帶錢帛有差
其後比歲繼來龍蕃衆至四百人往返萬里神宗憫其
勤詔五姓蕃五歲聽一貢人有定數無輒增加及別立
首領以息公私之擾命宋敏求編次諸國貢奉錄客省
四方館撰儀皆著爲式元豐五年張蕃乞添貢奉人至
三百詔故事以七十人爲額不許七年西南程蕃乞貢
方物願依五姓蕃例注籍從之元祐二年西南石蕃石
以定等齋表自稱西平州武聖軍禮部言元豐著令以

五年一貢爲限今年限未及詔特令入貢五年八年紹聖四年龍蕃皆貢方物龍氏於諸姓爲最大其貢奉尤頻數使者但衣布袍至假伶人之衣入見蓋實貧陋所冀者恩賞而已故事蠻夷入貢雖交趾于闐之屬皆御前殿見之獨此諸蕃見於後殿蓋卑之也元符二年又有牟韋蕃入貢詔以進奉人韋公憂公市公利等爲郎將諸蕃部族數十獨五姓最著程氏韋氏皆比附五姓故號西南七蕃云

施州蠻者夔路徼外熟夷南接牂牁諸蠻又與順富高溪四州蠻相錯蓋唐彭水蠻也咸平中施蠻嘗入寇詔

以鹽與之且許其以粟轉易蠻大悅自是不爲邊患後
因饑又以金銀倍實直質于官易粟官不能禁熙寧六
年詔施州蠻以金銀質米者估實直如七年不贖則變
易之著爲令熊本經制清井事蠻酋田現等內附夔路
轉運判官董鉞副使孫珪知施州寇平皆以招納功被
賞施黔比近蠻子弟精悍用木弩藥箭戰鬥趨捷朝廷
嘗團結爲忠義勝軍其後瀘州清井石泉蠻叛皆獲其
用

高州蠻故夜郎也在涪州西南宋初其酋田仙以地內
附賜名珍州拜爲刺史仙以郡多火災請易今名大觀

二年有駱解下上族納土復以玠州名云

瀘州西南徼外古羌夷之地漢以來王侯國以百數獨夜郎滇邛都雋昆明徙祚都冉駹白馬氐爲最大夜郎在漢屬牂牁郡今涪州之西溱播玠等州封域是也滇在漢爲益州郡今姚州善闡之地是也邛都雋州會同川與吐蕃接今邛部州蠻所居也雋今雋州昆明在黔瀘徼外今西南蕃部所居也徙今雅州嚴道地祚都在黎州南今兩林及野川蠻所居地是也冉駹今茂州蠻汶山夷地是也白馬氐在漢爲武都郡今階州汶州蓋羌類也此皆巴蜀西南徼外蠻夷也自黔恭以西至涪

瀘嘉叙自階又折而東南至威茂黎雅被邊十餘郡綿
亘數千里剛夷惡獠殆千萬計自治平之末訖于靖康
大抵皆通互市奉職貢雖時有剽掠如鼠竊狗偷不能
爲深患叅考古今辨其封域以見琛贐之自至梯航之
所及者爾若夫邊荆楚交廣則係之溪峒云清水夷者
羈縻十州五圉蠻也雜種夷獠散居溪谷中慶歷初瀘
州言管下溪峒十州有唐及本朝所賜州額今烏蠻王
子得蓋居其地部族最盛旁有舊姚州廢已久得蓋願
得州名以長夷落詔復建姚州以得蓋爲刺史鑄印賜
之得蓋死其子竊號羅氏鬼主鬼主死子僕射襲其號

浸弱不能令諸族烏蠻有二酋領曰晏子曰斧望箇恕常入漢地鬻馬晏子所居直長寧寧遠以南斧望箇恕所居直納溪江安以東皆僕夜諸部也晏子拒漢地絕近猶有清井之阻斧望箇恕近納溪以舟下瀘不過半日二酋浸强大擅劫晏州山外六姓及納溪二十四姓生夷夷弱小皆相與供其寶熙寧七年六姓夷自清井謀入寇命熊本經制之景思立戰没本將蜀兵募土丁及夷界黔州弩手以毒矢射賊賊驚潰於是山前後長寧等十郡八姓及武都夷皆內附提點刑獄范百祿作文以誓之曰蠢茲夷醜清溪之澔爲虺爲豺憑負固圍

殺人于貨頭顱草莽莫慘燔炙莫悲奴虜狙唬熟慝胡
可悉數疆吏苟玩禁不敢語奮若之歲曾是疆禦躑躅
嘯聚三壕羅募債我將佐戕我士伍西南繹騷帝赫斯
怒帝怒伊何神聖文武民所安樂惟曰慈撫民所疾苦
惟曰砭去乃用其良應變是許粥熊裔孫爰馭貔虎殲
其渠酋判其黨與旣奪之心復斷右股攝提孟陬徂征
有叙背孤擊虛窾入厥阻兵從天下鐵首其舉紛紜騰
沓莫敢嬰悟火其巢穴及其困貯暨其貲畜墟其林無
殺傷係縲以百千數涇灘望風悉力比附丁爲帝民地
曰王土投其器械籍入官府百死一贖莫保銅鼓歆盟

神天視此狗鼠敢忘誅絕以干罪罟乃稱上恩俾復故處殘醜厥角泣血懇語天子之德雨暘覆護三五噍類請比涇佗大邦有令其戒警汝天旣汝貸汝勿予侮惟十九姓往安汝堵吏治汝責汝力汝布吏時汝耕汝稻汝黍懲劓于今無怙往古小有堡障大有城戍汝或不聽汝擊汝捕尚有虓將突騎強旅傅此黔軍毒矢勁弩天不汝容暴汝居所不汝遺育悔於何取立石于武寧砦熊本言二酋桀黠不羈縻之則諸蠻未易服遂遣人說誘招納於是晏子斧望箇恕及僕夜皆願入貢受王命晏子未及命而死乃以箇恕知歸來州僕夜知姚州

以箇恕之子乞弟晏子之子沙取祿路竝爲把截將西南夷部巡檢八年俞州獠寇南州獠酋阿訛率其黨奔箇恕熊本重賞檄斬訛訛桀黠習知邊境虛實箇恕匿不殺詭降于納溪訛得不死甚德箇恕爲伺邊隙會箇恕老厭兵以事屬乞弟遂與訛侵諸部十年羅苟夷犯納溪砦初砦民與羅苟夷競魚苟誤毆殺之吏爲按驗夷已忿謂漢殺吾人官不償我骨價反暴露之遂叛提點刑獄穆珣言納溪去瀘一舍羅苟去納溪數里今託事起端若不加誅則烏蠻觀望爲害不細乃詔涇原副總管韓存寶擊之存寶召乞弟等犄角討蕩五十六村

十三國蠻乞降願納土承賦租乃詔罷兵元豐元年乞弟率晏州夷合步騎六千至江安城下責平羅苟之賞城中守兵纔數百震恐不能授甲蠻數日乃引去知瀘州喬叙要欲與盟遣梓夔都監王宣以兵二千守江安仍奏以乞弟襲歸來州刺史韓運遣小校楊舜之召乞弟拜敕乞弟不出遣就賜之亦不見而令小蠻從舜之取敕以去喬叙因沙取祿路以賄招乞弟乃肯來三年盟于納溪蠻以爲畏己益悖慢盟五日遂以衆圍羅箇牟族羅箇牟熊本所團結熟夷也王宣往救之蠻解圍合力拒官軍宣與一軍皆沒事遂張駟召存寶授方略

統三將兵萬八千趨東川存寶怯懦不敢進乞弟送欵
給降存寶信之遂休兵于綿梓遂資間四年詔以環慶
副總管林廣代存寶按寶逗撓誅之熟夷楊光震殺阿
訛詔林廣與光震圍力討賊乞弟恐復送欵帝以其前
後反覆無真降意督廣進師廣遂破樂攻城至斗蒲村
斬首二千五百級次落婆乞弟乃納降廣盛陳兵以受
之對語良久乞弟疑有變引衆遁廣帥兵深入會大雨
雪浹旬始次老人山山形劔立度黑崖至鴉飛不到山
五年正月次歸來州天大寒然桂爲薪軍士皆凍墮指
留四日求乞弟不可得內侍麥文昞問廣軍事廣曰賊

未授首當待罪文昞乃出所受密詔曰大兵深入計賊期在梟獲元惡如己破其巢穴雖未得乞弟亦聽班師軍中皆呼萬歲曰天子居九重明見萬里外乃以衆還自納溪之役師行凡四十日築城樂共城江門砦梅嶺席帽溪堡西達清井東道納溪皆控制要害捷書聞赦梓州路以歸來州地賜羅氏鬼主乞弟既失土窮甚往來諸蠻間無所依帝猶欲招來之命知瀘州王光祖開諭許以自新會其死於是羅始党斗然斗更等諸酋請依十九姓團結新取生界八姓兩江夷族請依七姓團結皆爲義軍從之自是瀘夷震懼不復爲邊患沙取祿

宋史卷四百九十六
死傳
三
路死子驚弊承襲政和五年晏州夷卜漏叛若將高公
老遁招討使趙適討平之授驚弊西南夷界都大巡檢
事見趙適傳

宋史卷四百九十六

庶子

臣

林蒲封謹言宋史成于元代元世祖時修

遼金二史尚未及宋至正三年始詔並修命脫脫
總裁而發凡起例出於歐陽元之筆居多今舊刻
止南北二本頗有漫漶錯落此外別無他本可据
雖宋世名儒輩出如司馬光通鑑朱子綱目兼綜
前代致爲精詳而宋朝之事無紀焉臣等奉

敕校勘謹就續本通鑑續本綱目五代史南唐書十國
春秋九國志遼元諸史以及通考通典玉海冊府
元龜並諸家文集中確有證佐者徵引若干條附
於卷末以備參考云臣謹識

原任詹事

臣

陳浩少詹

臣

裘曰修庶子

臣

林蒲

侍讀

臣

周玉章

臣

齊召南編修

臣

潘乙震

臣

栢謙

臣

何其睿

臣

錢琦

臣

李龍官

臣

葉酉檢討

臣

郭肇

璜御史

臣

楊開鼎拔貢生

臣

王濟師

臣

龔元朱等

奉

敕恭校刊

